

Revelesen **(Gêñ nanj Yisu hoc asê têtj Jon)** **Yom whê bapia dindéc sa-nga**

Lau tiguauc sêsôm bu Jon, nanj to bapia dindéc (1:1-2, 4), nanj inj ngac tigenj nanj to Jon ndê ñawaê ñayham ma Jon ndê bapia tö. Têtj ndoc inj to bapia dindéc, nanj lau sêkêñ whinj-nga sêtap kisa atu ti ñawapac daêsam sa. Nacyo sêkêñ Jon dau ndöc nduc Patmos tu inj ndê gwelenj ñawaê ñayham-nga. Jon to bapia dindéc, tu bu puc lau sêkêñ whinj-nga dôñ bu sêlhac ñangga ma sêhu si sêkêñ whinj sinj dom.

Gêñ daêsam nanj Jon to sip bapia dindéc, nanj inj sôm bu Nalau Dabuñ kôm inj ndê gatu kainj danj sa, ma Anötö hoc asê têtj inj gitôm gêñ ñagatu. Mac oc alic bu Jon to namba 7 ma namba 12 tidim daêsam yêc bapia dindéc ñalôm. Lau Israel-nga sêlic namba 12 bu gêñ atu, ma hêganônj lau Israel-nga si toñ 12. Ma namba 7 hêganônj gêñ nanj ñayham sambuc, ma ñac sêsôm bu Anötö ndê namba.

Yom daêsam hêganônj gêñ nanj oc meñ sa têtj têtj ñambu-nga. Sadañ oc kôm gwelenj ñangga bu êntôm lau nom-nga, magoc tinjambu Anötö oc êngwiniñ inj ti lau hoñ nanj sêñkuc inj, ma señ ñac su. Ma lau sêkêñ whinj-nga nanj sêlhac ñangga ma sêhu si sêkêñ whinj sinj dom, nanj oc sêtap mwasiñ atu sa, ma Anötö oc kôc ñac sa sêndöc malac Jerusalem wakuc.

Yom namata-nga

¹ Yom dindéc nahu Yisu Kilisi, nan hoc asê têt Jon. Yom dau hêganôn gêt hon nan kêpij bu hóc asê. Anötö kêj yom dau têt Yisu Kilisi bu tôc asê têt lau nan sem akiñ in. Ma Yisu kêkiñ in ndê anela dan bu hoc yom dau asê têt in ndê ngac akiñ Jon. ² Ma Jon to yom dindéc pi gêt hon nan in gêlic, ma puc yom dau dôn bu yom nandô nan meñ akêj Anötö lu Yisu Kilisi dau.

³ Yom nan yêc bapia dindéc, nan bu tôc gêt nan oc hóc asê têt têt nambu-nga, nan asê, gitôm yom nan propet akwa-kwa sêhoc asê mun su. Ma ndoc meñ kêpij bu gêt hon dau nandô sa. Bocdinañ lau nan sêsam yom dindéc asê, ma lau nan sêngô ma sêkôc sa tidôn sip nac si nalôm, nan hon oc sêtap Anötö ndê mwasiñ sa.

Jon kêkiñ yom têt gôlôwac dabuñ toñ 7

⁴ Aö Jon, gato yom dindéc têt Kilisi ndê gôlôwac dabuñ toñ 7 nan sêmbo gameñ Esia-nga. Mwasin ti atac malô têt mac akêj Daman Anötö nan mbo têt namata-nga, kwahic dec mbo, ma oc meñ tinambu-nga, ma akêj nalau 7 nan sêlhac in ndê pôn kiñ-nga na-ndö-nga, ⁵ ma akêj Yisu Kilisi. Yisu in ngac namata-nga bu tisa akêj lau batê-nga, ma in gêm gôlin kiñ nom-nga hon. In kalhac nannga bu hoc yom nandô asê pi Anötö. Ma in tac whin yac, dec kêc ndê dac sin bu êngapwêc yac su yêc yac neñ sac. ⁶ Ma in kôc yac sa datôm lau toñ tigen nan dambo in ndê tğôlin napu, ma datôm lau dabuñ-siga bu danem akiñ in ndê Damba Anötö. In naclai ti nawasi natau, dec dahoc in ndê waê asê têt

bêc hoñ. Yomandô! ⁷ Alic su nañ. Inj oc sip whin dao meñ, ma lau hoñ oc sêlic inj. Aêc, ma lau nañ sic inj ndu, nañ oc sêlic inj sêwhin. Lau nom-nga hoñ oc sêtañ atu tu inj-nga. Yomandô andô!

⁸ Pômdau Anötö sôm, “Aö Ñaclai Ñadau. Têñ ñamata-nga aö gambo, kwahic dec aö gambo, ma aö oc wambu wameñ tiyham. Aêc, aö gac hu gêñ hoñ, ma wandic dabinj gêñ hoñ.”

Yisu hoc dau asê têt Jon

⁹ Aö Jon, mac nem asidôwa gato yom dindec. Yac dati Yisu ndê lau, ma dambo inj ndê gôlinj ñapu. Tu dinañ-nga lau sêkêñ kisa yac, magoc tamasañ dauñ bu dalhac ñaŋga. Muñ-nga lau sêmasuc aö ma sêkêñ aö gandöc nduc nañ sêsam bu Patmos. Ñahu bu aö galhac ñaŋga ma gapuc Anötö ndê yom dôñ, ma gahoc yom ñandô asê pi Yisu. ¹⁰ Aö gandöc Patmos, ma têt lau sêkêñ whin-nga si bêc sênem akinj Pômdau-nga dañ, Ñalau Dabuñ kôm aö gatunj kainj dañ sa. Ma aö gaŋgô awha atu dañ gitôm dahuc tañ yêc aö ñambu-nga. ¹¹ Ma awha dau sôm, “Gêñ nañ am oc lic, nañ to sip bapia, ma êmkinj têt gôlôwac dabuñ toñ 7 nañ sêndöc malac 7, nañ Epesas, Smena, Pegamam, Tayatira, Sadis, Piladelpia ma Laodisia.”

¹² Aö gaŋgô yom dau, goc gakac dauñ kwi bu walic bu asa sôm yom dau. Ma aö galic yakainj 7 nañ sêmasañ ña gol. ¹³ Ma yêc yakainj 7 dau ñalhu aö galic ñgac dañ gitôm Ñamalac ndê Atu. Inj sôc ñakwê balinj nañ sip têt inj gahi, ma kic po nañ ñawasi gitôm gol kêgihi inj ñabapo. ¹⁴ Inj kêclaunj sêp sambuc, ma inj tandô ñawê gitôm

ya. ¹⁵ In gahiapa nawasi gitôm ain yanyan nê brons nan sêpec sa ya ma namsic. Ma in awha nakêcsia gitôm bu nan hêc atu. ¹⁶ In ango andô nawasi atu gitôm ac nawê. Yêc in amba andô-nga in kôc tata 7, ma bien baliñ ti namata yêc danğa-danğa sa akên in whasun.

¹⁷ Têñ ndoc aö galic in aö gahu daun gasip nom gayêc in gahi-nga gitôm ngac batê dan. Magoc in kên amba andô-nga sac aö, ma sôm, “Töc daôm dom. Aö gati namata gêñ hon, ma aö gati nambu gêñ hon. ¹⁸ Aö Anötö nan gambo tanli. Mun-nga aö gambac ndu, tigen lic! Kwahic dec aö gambo tanli, ma wambo tanli napan. Ma aö gakôc ki gatam-nga bu wanğapwêc lau su yêc lambwam ma yêc lau batê si gameñ.

¹⁹ “Bocdinañ to yom pi gêñ nan am gêlic su, pi gêñ nan kwahic dec nandô sa, ma pi gêñ nan oc nandô sa tinambu. ²⁰ Tata 7 nan yêc aman andô-nga, ma yakain gol 7 nan aö wawhê nahu sa têt am. Tata 7 dinañ sêti dôhôn anela 7 nan sêyob gôlôwac dabun ton 7, ma yakain 7 sêti dôhôn gôlôwac dabun ton 7 dinañ-nga.”

2

Jon to yom têt gôlôwac dabun yêc malac Epesas

¹ Ma in sôm têt aö, “To yom têt anela nan yob gôlôwac dabun Epesas-nga bocdec bu:

Yom dindec meñ akên in nan kôc tata 7 yêc amba andô-nga, ma kêsêlên mbo yakain gol 7 nalhu. ² Mac lau Epesas-nga. Aö kayalê mac nem mêtê hon su, ma mac akôm gwelen

atu ayêma daôm su, ma mac alhac ñaŋga tu ahôc ñawapac-ña. Ma aô kayalê bu mac atac tec lau sac ma amasuc ñac su. Ma lau naŋ sênsau ma sêsam dau bu aposel, naŋ mac aŋsahê ñac, ma aŋyalê ñac bu lau tasan. ³ Mac alhac ñaŋga ma ahôc ñawapac ti kisa tu aneŋ ñaê-ña, magoc mac kwampac sa dom. Gêŋ hoŋ dinaŋ mac akôm ñayham.

⁴ Tigeŋ mac nem mêtê so daŋ yêc naŋ aô galic yham dom. Ñamata-ña mac atac whiŋ aô ñandô. Tigeŋ kwahic dec mba! ⁵ Bocdinaŋ gauc nem mac nem mêtê ñamata-ña dinaŋ, naŋ kwahic dec mac ahu siŋ su. Ma anem nem ñalôm kwi ma akôm mêtê ñayham gitôm ñamata-ña. Bu mba, dec aô watêŋ mac wameŋ, ma wakôc mac nem yakaiŋ su.

⁶ Magoc aô galic ñayham bu mac atac tec Nikolai* ndê lau si lêŋ sac, gitôm aô dauŋ gatec.

⁷ Asa ndê danŋasuŋ yêc, naŋ ñgô yom dindec naŋ Ñalau Dabuŋ sôm têŋ Anötö ndê gôlôwac dabuŋ. Lau hoŋ naŋ sêlhac ñaŋga ma sêku sac dulu, naŋ wakêŋ ñac sêmbo Anötö ndê †Paradais ma sêneŋ ñandô yêc A Tanli-ña.

Jon to yom têŋ gôlôwac dabuŋ yêc malac Smena

* **2:6** Nikolai kêdôhôn lau bu sêlic mêtê sac gitôm gêŋ nambwa. In sôm bu Kilisi ndê lau gitôm bu sênem akiŋ anötöi gwam, ma sêkôm mêtê mockaiŋ-ña.

⁸ “Ma to yom têtj anjela nanj yob gôlôwac dabunj Smena-nga bocdec bu:

Yom dindec mej akêj inj nanj tinjamata gêj honj ma tinjambu gêj honj, inj nanj mbac ndu ma tisa ma mbo tali tiyham. ⁹ Aô kayalê bu mac lau Smena-nga ahôc njawapac atu, ma mac andöc nom atôm lau njalôm sawa. Tigenj yêc Anötö anjô-nga mac ati lau ti lêlôm. Aô kayalê yom honj nanj lau nanj sêsap lau Israel-nga si sakinj akwa dôj, nanj sêsôm pi mac. Njác lau dau sêtoc dau sa bu njác lau Israel-nga nanj Anötö kêyalinj njác sa sêti inj ndê lau. Tigenj mba! Njác Sadañ ndê lau solop. ¹⁰ Atôc daôm dom pi njawapac nanj oc mej. Anjô! Sadañ tac whinj bu êñsahê mac, ma inj ndê lau oc sêkêj mac nem lau njatô sêndöc gapocwalô. Tigenj mac oc ahôc njawapac tôm bêc 10 ma pacndê. Mac bu ahôc njawapac e tôm lau sêndic mac ndu, magoc alhac njanga ma ahu aô sinj dom. Ma bocdinañ aô wakêj mac andöc tamli njapañ, nanj ti mac nem njâli.

¹¹ Asa ndê dangasuj yêc, nanj njô yom dindec nanj Njalau Dabunj sôm têtj Anötö ndê gôlôwac dabunj. Lau honj nanj sêlhac njanga ma sêku sac dulu, nanj oc sêtap njandê sa têtj bêc nanj lau sêmbac ndu tidim tilu-nga,† nanj dom.

Jon to yom têtj gôlôwac dabunj yêc malac

† **2:11** Bêc nanj lau sêmbac ndu tidim tilu-nga - bêc nanj Anötö oc êmatôc lau honj, ma lau sac oc sêsip ya atu nanj sa njapañ sêndi bu sêhóc njandê njapañ. Alic yom njatô yêc Rev 20:14; ma 21:8.

Pegamam

¹² “Ma to yom têtj aņela naņ yob gôlôwac dabuņ Pegamam-ņga bocdec bu:

Yom dindec meņ akêņ iņ naņ hóc bien baliņ naņ ņamata yêc danġa-danġa. ¹³ Aô kayalê mac lau Pegamam-ņga nem gameņ, naņ lau daêsam sêmbo Sadaņ ndê gôliņ ņapu. Tigeņ mac asap aô dôņ ņapan, ma ahu nem akêņ whiņ aô-ņga siņ su dom. Yêc Sadaņ ndê malac dinaņ, lau sic aneņ ņgac akiņ Antipas ndu. ņahu bu iņ hoc yom ņandô asê pi aô, ma sêc aô ahuc dom. Ma mac bocdinaņ, têtj ndoc dinaņ aô galic bu mac ahu aô siņ dom.

¹⁴ Tigeņ mac akôm gêņ ņatô naņ aô galic bu solop dom. Mac nem lau ņatô sêņkuc Balam ndê yom. Têtj têtj ņamata-ņga Balam kêdôhôn lau Israel si ņgac bata Balak bu êntôm lau Israel-ņga bu sêkôm mêtê sac. ņac seņ gêņ daneņ-ņga naņ lau sêkêņ ti da têtj anötö gwam. Ma sêkôm mêtê sac mock-aiņ-ņga whiņ. Ma kwahic dec mac nem lau ņatô sêņkuc mêtê kaiņ dinaņ. ¹⁵ Ma gêņ dan tiyham. Mac nem lau ņatô sêņkuc yom naņ Nikolai kêdôhôn têtj lau. ¹⁶ Bocdinaņ anem daôm kwi. Bu mba, dec ņasawa sauņ aô watêņ mac waloc, ma wandic lau naņ sêsa lêņ kaiņ dinaņ ņa bien baliņ naņ sa yêc aô whaņsuņ.

¹⁷ Asa ndê dangasuņ yêc, naņ ņġô yom dindec naņ ņalau Dabuņ sôm têtj Anötö ndê gôlôwac dabuņ. Lau hon naņ sêlhac ņaņga ma sêku sac dulu, naņ wakêņ ņac sêneņ gêņ

daneŋ-ŋga naŋ kwahic dec yêc siŋ dau yêc undambê, gitôm gakêŋ †mana têŋ lau Israel-ŋga seŋ yêc gameŋ sawa. Ma aö wakêŋ hoc sêsêp tigeŋ-tigeŋ têŋ ŋac tôm ndi. Yêc hoc tigeŋ-tigeŋ aö wato ŋaê wakuc pi, naŋ lau daŋ sêŋyalê dom. Asa naŋ kôc hoc dau ŋadaŋ, naŋ oc êŋyalê.

Jon to yom têŋ gôlôwac dabuŋ yêc malac Tayatira

¹⁸ “Ma to yom têŋ aŋela naŋ yob gôlôwac dabuŋ Tayatira-ŋga bocdec bu:

Yom dindéc meŋ akêŋ Anötö ndê Atu, iŋ naŋ ndê tandô ŋawê gitôm ya ŋawahô, ma gahi gitôm brons naŋ ŋawasi atu. ¹⁹ Aö kayalê mac lau Tayatira-ŋga nem mêtê hoŋ su, bu mac akêŋ whiŋ aö ŋaŋga, ma asap mêtê atac whiŋ-ŋga dôŋ. Aö kayalê bu mac alhac ŋaŋga ma am akiŋ aneŋ lau. Ma kwahic dec mac akôm gêŋ dinaŋ hóc gêlêc ŋamata-ŋga su.

²⁰ Tigeŋ mac nem mêtê daŋ aö galic yham dom. Awhê sac daŋ mbo mac nem gôlôwac dabuŋ ŋalôm, naŋ gitôm kwin sac Jesebel. Iŋ sam dau bu aneŋ propet awhê daŋ, magoc iŋ kédôhôn aneŋ lau bu sêkôm mêtê mockaiŋ-ŋga, ma bu sêneŋ gêŋ daneŋ-ŋga naŋ lau sêkêŋ ti da têŋ anötöi gwam. Iŋ kôm mêtê sac bocdinaŋ, magoc mac asoc iŋ su yêc mac nem gôlôwac dabuŋ dom. ²¹ Aö gakêŋ ŋasawa têŋ iŋ bu nem dau kwi, tigeŋ iŋ sap iŋ ndê mêtê sac dôŋ ŋapaŋ. ²² Alic su naŋ! Kwahic dec aö wakêŋ ŋandê atu têŋ

in, ma têtj lau nanj sêkôm mêtê mockaij-nga sêwhin in, nanj bocdinaj. Nac bu sênem dau kwi dom, dec nac oc sêhóc nâwapac atu. ²³ Ma aö oc wandic in ndê balêkoc ndu sêwhin. Tu dinaj-nga dec Kilisi ndê lau honj oc sênyalê bu aö kayalê namalac si gauc ti njalôm honj. Ma aö wakêj njagêyô têtj mac honj tôm ndi, ênjuc mêtê nanj mac lau tigen-tigen akôm.

²⁴ Mac lau Tayatira-nga njatô asôc awhê sac dinaj ndê yom njapu dom. Ma yom nanj sêsam bu Sadañ ndê yom nanj yêc sinj dau, nanj mac akip sa dom. Bocdinaj aö oc wakêj nâwapac wakuc têtj mac ahóc dom. ²⁵ Gêj tigenj aö atac whin, nanj asap mêtê njayham nanj mac akôm ambo, nanj dôj e wambu wamej.

²⁶ Asa nanj bu lhac nãnga ma ku sac dulu, ma sôc anej yom njapu e bêc nambu-nga, nanj wakêj njac lai têtj in bu nem gôlinj lau sambuc, ²⁷ gitôm Damañ kêtj njac lai têtj aö daun. Tôm yom nanj sêto yêc nanj sôm bocdec bu:

Inj kôc têtj kinj-nga bu nem gôlinj lau sambuc ti njac lai atu, ma inj oc ku nac dulu gitôm njac dañ tuc lôj andô dañ popoc. *[BW 2:9]*

²⁸ Ma asa nanj bu lhac nãnga, nanj aö daun oc wambo wawhin in ti njawasi atu gitôm tata bêbêc-nga. ²⁹ Asa ndê dangasuj yêc, nanj ngô yom dindec nanj Nalau Dabuñ sôm têtj Anötö ndê gôlôwac dabuñ.

3

Jon to yom têtj gôlôwac dabun yêc malac Sadis

¹ “Ma to yom têtj anela nan yob gôlôwac dabun Sadis-nga bocdec bu:

Yom dindec meŋ akêŋ in nan mbo whin Anötö ndê ŋalau 7 ma kôc tata 7. Aö kayalê mac lau Sadis-nga nem mêtê hoŋ. Lau ŋatô gauc gêm bu mac alhac ŋanŋa ma akôm Anötö ndê gwelen. Tigen mba! Mac atôm lau batê! ² Yêc aneŋ Anötö anŋô-nga aö galic bu mac ac dabiŋ mac nem gwelen ŋapep dom. Bocdinaŋ tampo sa ma atisa! Mac nem akêŋ whin kêpiŋ bu oc pacndê. Bocdinaŋ apuc nem akêŋ whin dôŋ maŋ. ³ Gauc nem yom hoŋ nan mac anŋô ti akôc sa su. Ma anem nem ŋalôm kwi ma daŋam wambu yom dau. Mac bu anem ali dom, dec wambu wameŋ gitôm ŋac kaŋ, ma mac oc anyalê ndoc wameŋ-nga dom.

⁴ Magoc aö kayalê lau Sadis-nga ŋatô nan sêkôm mêtê sac dom, dec galic ŋac tôm lau ti ŋakwê ŋawasi. Aö oc wakêŋ ŋakwê sêsêp têtj lau dinaŋ sêsôc, bu aö galic ŋac ŋayham, ma ŋac oc sêmbo sêwhin aö ŋapan. ⁵ Ma lau ŋatô nan sêlhac ŋanŋa ma sêku sac dulu, nan wakêŋ ŋakwê sêsêp têtj ŋac bocdinaŋ. Ma yêc Damaŋ ti in ndê anela anŋô-nga, aö wasam ŋac si ŋaê asê, ma watôc asê bu sêti aneŋ lau solop. Ma ŋac si ŋaê oc yêc Buku

Tañli-nga* ñapañ.

⁶ Asa ndê danğasun yêc, nañ ngô yom dindec nañ Nalau Dabuñ sôm têtñ Anötö ndê gôlôwac dabuñ.

Jon to yom têtñ gôlôwac dabuñ yêc malac Piladelpia

⁷ “Ma to yom têtñ añela nañ yob gôlôwac dabuñ Piladelpia-nga bocdec bu:

Yom dindec meñ akêtñ ngac dabuñ nañ sôm yom ñandô eñ. Inj kôc Kin Dawid ndê ki gatam-nga, ma gatam bocke nañ inj gêlêc su, nañ lau dan sêtôm bu sêndic ahuc dom. Ma gatam nañ inj gic ahuc, nañ lau dan sêtôm bu sêkac sa dom. ⁸ Mac lau Piladelpia-nga. Aö kayalê mac nem mêtê hoñ su. Mac lau ti licwalô atu dom, tigenj aö kayalê bu mac danjam wambu aneñ yom, ma asêc aneñ ñaê ahuc dom. Bocdinañ alic su nañ! Kwahic dec aö walêc gatam dan su bu wanem mac sa-nga, ma lau danj oc sêtôm dom bu sêndic ahuc. ⁹ Lau nañ sêsap lau Israel-nga si sakinj akwa dôñ, nañ sêtoc dau sa bu ñac lau Israel-nga nañ Anötö kêyalinj ñac sa. Magoc mba. Ñac lau tasanj, ma Sadañ ndê lau ñac. Aö wanğwiniñ ñac e sêtêtñ mac sêmeñ ma sêhu dau sêyêc mac gahim-nga. Ma têtñ

* **3:5** Buku Tañli-nga - lau hoñ nañ sêkêtñ whinj Yisu ma sêtap Anötö ndê mwasinj dandöc tañli ñapañ-nga sa, nañ si ñaê yêc Buku Tañli-nga dau. Buku ñatô sêyêc undambê, nañ sêto yom yêc ñalôm pi gêtñ ñayham ma sac hoñ nañ yac tigenj-tigenj dakôm (Rev 20:12-13). Sêto yom pi Buku Tañli-nga dau yêc Pil 4:3; Rev 13:18; 17:8; 20:12, 15; ma 21:27.

ndoc dinañ ñac hoñ oc sêñyalê tidôn bu mac lau nañ aö atac whiñ mac ndu andô.

- ¹⁰ Mac apuc daôm dôñ ma alhac ñaŋga têt ndoc ñawapac ti kisa tap mac sa, tôm aö gac atu mac muñ su. Bocdinañ aö wayob mac têt ndoc ñawapac-ña nañ oc hôc asê bu êñsahê lau nom-ña hoñ. ¹¹ Ndoc meñ kêpiñ bu aö wambu wameñ. Bocdinañ akôc yom ñandô dôñ ma ayob ñapep, bu lau dañ sênem kañ nem ñaôli ñayham dom. ¹² Lau nañ sêlhac ñaŋga ma sêku sac dulu, nañ aö wakêt ñac sêndöc aneñ Anötö aŋgô-ña ñapañ tôm alhö ñaŋga nañ sêlhac iñ ndê lôm dabuñ. Lau dinañ oc sêmbo sêwhiñ Anötö yêc malac Jerusalem wakuc, nañ iñ oc kêñ sip akêt undambê meñ, dec aö oc wato aneñ Anötö ndê ñaê ma iñ ndê malac wakuc dau ñaê pi ñac. Ma aö wato aö dauñ neñ ñaê wakuc pi ñac whiñ.
- ¹³ Asa ndê daŋgasuñ yêc, nañ ñgô yom dindec nañ Ñalau Dabuñ sôm têt Anötö ndê gôlôwac dabuñ.

Jon to yom têt gôlôwac dabuñ yêc malac Laodisia

¹⁴ “Ma to yom têt añela nañ yob gôlôwac dabuñ Laodisia-ña bocdec bu:

Yom dindec meñ akêt Yom Ñandô Ñadau. Iñ sôm yom ñandô eñ, ma bocdinañ yac dakêt whiñ iñ ndê yom ma atac lu-lu dom. Ma iñ gêm gôliñ gêt hoñ nañ Anötö kêñ. ¹⁵ Aö kayalê mac lau Laodisia-ña nem mêtê hoñ. Mac asôm bu akêt whiñ aö, tigeñ mac akêt

whiņ aö ti nem ņalôm sambuc dom. Mac lau tasan! Mac bu ahu aö siņ gacgeņ, me akêņ whiņ aö ti nem ņalôm sambuc, dec oc ņayham. ¹⁶ Tigeņ mba! Mac aņsau bu aņkuc aö. Bocdinaņ oc waseņ mac su tôm ņgac naņ kêsahê gêņ sac yêc iņ whasuņ dec kêlôwê sa. ¹⁷ Mac asôm bu mac ati lau ti lêlôm ma lau tiwaê naņ apônda gêņ daņ dom. Tigeņ mac aņyalê dom bu yêc Anötö angô-ņga mac atôm lau ņalôm sawa, ma lau tandô pec, ma lau ņakwê mbasi. ¹⁸ Bocdinaņ aņgô aneņ yom dindec. Mac bu ati lau ti lêlôm, dec atêņ aö amen, ma aö wakêņ gol ņandô ņayham têņ mac anemlhi. Ma anemlhi ņakwê sêsêp asôc-ņga bu ambo ņamlic ņambwa dom ma mayam pac. Ma anemlhi malasın bu aņgwasıņ tanôm e tanôm ņawa sa.

¹⁹ Lau naņ aö atac whiņ, naņ bu sêkôm gêņ giso, dec aö wasôm ņac ma wamatôc ņac tu bu sêhu mêtê sac dau siņ. Boc-dinaņ aņgô aneņ yom. Anem daôm kwi ma akôm ņaņga bu aņkuc aö. ²⁰ Alic! Aö gatôm mac nem silip daņ naņ meņ kalhac am nem andu ņagatam ma kêmati gatam mbo. Ma bocdinaņ asa naņ ņgô aö awhaņ ma gêlêc gatam dau su têņ aö, naņ aö oc wasôc watêņ iņ wandi, ma alu aneņ gêņ awhiņ dauņ.

²¹ Aö gaku ņaclai sac-ņga hoņ dulu, dec Damaņ kôc aö sa gandôc gawhiņ iņ yêc iņ ndê pôņ kiņ-ņga. Ma ņalêņ tigeņ lau hoņ naņ sêlhac ņaņga ma sêku sac dulu, naņ wakôc ņac sa bu sênem gôliņ sêwhiņ aö yêc aneņ pôņ kiņ-ņga.

22 Asa ndê dangasuj yêc, nañ ngô yom dindec nañ Nalau Dabuñ sôm têtj Anötö ndê gôlôwac dabuñ.”

4

Jon gêlic gêñ atu undambê-nga

¹ Dinañ su, goc aö galic gatam dan nañ kac sa su yêc undambê. Ma awha nañ aö ganğô muñ su gitôm dahuc tañ, nañ sôm têtj aö bu, “Pwi mwen, ma gêñ nañ oc hóc asê tiñambu-nga, nañ watóc têtj am.” ² Têtj dinañ Nalau Dabuñ kôm aö gatuñ kaiñ dan sa, ma aö galic pônj kiñ-nga dan kalhac undambê, ma pônj ñadau ndöc ñahô. ³ Ma in nañ ndöc, nañ ndê ñawasi atu, gitôm ðhoc ñayham lu nañ sêsam bu jasper ma kanelian. Ma gasuñ bu êp nañ ñadalô ñayham ma ñawasi gitôm hoc ñayham emerel, nañ kêgihi pônj atu dau ahuc. ⁴ Ma aö galic pônj 24 sêlhac sênğihi pônj atu, ma lau bata 24 sêndöc ñahô. Nac sêsöc ñakwê sêsêp, ma sanem gol yêc ñac si ñagôlônj tôm gi.

⁵ Ma aö galic sickac, ma ganğô wapap gic ti ñakêcsia atu sa akêñ pônj atu. Ma lam ti ñawê atu 7 sêlhac pônj ña-ndö-nga. Lam 7 dinañ Anötö ndê ñalau 7. ⁶ Ma yêc pônj dau ña-ndö-nga aö galic gêñ ñawasi atu poc gitôm bugictonj, ma ñawa gitôm glas.

Ma aö galic añela atu hale sêlhac sênğihi pônj atu. Nac sem gêñ tali ñatô anğô, ma tandô daêsam sêyêc ñac ñabapo ti ñadômbwê. ⁷ Añela hale dinañ anğô andô bocdec. Añela ñamata-nga ndê anğô gitôm layon, tilu-nga gitôm makao,

titö-nga gitôm ñamalac, ma aņela tihale-nga ndê aņgô gitôm macmpon naņ hu mbo lólôc. ⁸ Ñac tigeņ-tigeņ si ñamakê 6, ma tandô daêsam sem ñac ahuc, yêc ñamakê ñapu-nga whiņ. Ma ñac sêmpiņ Anötö ma sêsôm, “O Pômdau Anötö, Ñaņga Ñadau, am dabuņ, dabuņ, ma dabuņ eņ. Am mbo têņ ñamata-nga, kwahic dec am mbo, ma tiņambu am oc mbu mweņ.” Ñalêņ dinaņ ñac sêmpiņ iņ acsalô ma ôbwêc hoņ, sêņwhaņ dau dom.

⁹ Têm bocke naņ aņela hale dinaņ sêsôm yom dinaņ sêmpiņ iņ naņ ndöc pôn atu ma mbo tali ñapaņ, ma sem danęe iņ ti sêtoc iņ ndê waê sa, goc ¹⁰ lau bata 24 sêhu dau sêsip nom ma sêpôn haduc têņ iņ. Ma sêkêņ ñac si sanem sêyêc pôn atu ndö-nga, ma sêsôm yom bocdec bu, ¹¹ “O Pômdau yac mba Anötö. Am gêņ hoņ ñadau. Am kêmasaņ gêņ hoņ ma kêņ gêņ hoņ sêmbu tali, tôm am daôm tac whiņ. Tu dinaņ-nga dec am ñayham kêlêc, ma gic waê bu yac ampiņ am ti apo nem waêm sa, ma atoc am sa tu am nem ñawasi ti ñaclai atu-nga.”

5

†Anötö ndê Domba ma bapia tilhuņ

¹ Aö taņhê iņ naņ ndöc pôn atu, ma galic bapia tilhuņ daņ yêc iņ amba andô-nga, ma yom yêc bapia dau danęa lu-lu. Bapia dau sêņlhuņ sa,

ma sêkêḡ gêḡ ḡabalêḡ 7 pi ḡadali bu kôc dônḡ.*
 2 Ma aô galic aḡela ḡaḡḡa daḡ, naḡ mbwêc
 awḡa atu bocdec bu, “Asa iḡ ḡamalac gitêḡ,
 gitôm bu kôc gêḡ ḡabalêḡ su ma kac bapia dau
 sa?” 3-4 Iḡ mbwêc yom dinaḡ asê, tigeḡ yêc
 undambê, ma yêc nom ma nom ḡapu-ḡga, sêtap
 ḡamalac gitêḡ daḡ sa dom, naḡ gitôm bu kac
 bapia dau sa ma sam. Têḡ ndoc aô galic bu sêtap
 ḡamalac gitêḡ daḡ sa dom, naḡ aô gataḡ atu
 andô. 5 Magoc lau bata 24 si daḡ sôm têḡ aô, “Am
 taḡ dom! Lic su naḡ. ḡamalac gitêḡ daḡ mbo,
 naḡ ku ḡaclai sac-ḡga ti ḡaclai dambac ndu-ḡga
 dulu su, ma iḡ gitôm bu kôc gêḡ ḡabalêḡ 7 su, ma
 kac bapia dau sa. Iḡ naḡ sêsam bu ‘Layon naḡ
 sa akêḡ Juda ndê toḡ,’ ma ‘Dawid ndê Wakuc,’
 naḡ gitôm.”

6 Têḡ dinaḡ aô galic Domba daḡ naḡ ḡa-aḡḡô
 gitôm sic iḡ ndu su, magoc mbo tali tiyham. Iḡ
 kalhac ḡalhu kêpiḡ pônḡ atu, ma aḡela hale ti lau
 bata 24 sêḡḡihi iḡ ahuc. Iḡ ndê ḡapo 7, ma tandô
 7, naḡ sem dôhônḡ Anötô ndê ḡalau 7 naḡ iḡ kêḡ
 ḡac sêsa sêtêḡ nom ḡabatiḡ hoḡ. 7 Ma Domba
 dau ḡi kôc bapia dau su yêc iḡ naḡ ndôc pônḡ atu
 ndê amba andô-ḡga. 8 Iḡ kôc sa su goc aḡela hale
 ti lau bata 24 sêpônḡ haduc têḡ iḡ. Yêc ḡac hoḡ si
 amba sêkôc gêḡ wê-ḡga naḡ sêsam bu hap,† ma

* **5:1** Têḡ têm Jon to bapia dindec, naḡ lau naḡ bu sêkêḡ bapia
 daḡ têḡ lau ḡatô, naḡ sêkêḡ gêḡ ḡabalêḡ gitôm lêlêḡ me nomdac
 pi bapia dau bu sêsap dônḡ. Ma bocdinaḡ lau bambaliḡ gitôm dom
 bu sêkac bapia dau sa ma sêsam e hôc asê ḡamalac naḡ bapia
 dau ḡic iḡ ḡawaê. † **5:8** Hap - gêḡ gitôm gita ti wac daêsam,
 naḡ lau sêndic têḡ ndoc sênem wê-ḡga. Alic Rev 14:2; ma 15:2.

sùc naŋ sêmasaŋ ɲa gol, naŋ sêkêŋ gêŋ ɲamalu ɲayham sip e meŋhu. Gêŋ ɲamalu dinaŋ, naŋ mbec hoŋ naŋ Anötö ndê lau dabuŋ sêteŋ têŋ iŋ. ⁹ Ma ɲac sem wê wakuc daŋ bocdec, “Am gitêŋ andô, gitôm bu kôc bapia ma kac gêŋ ɲabalêp su. ɲahu bu lau sic am ndu, ma am nem dac gêmlihi lau su sêti Anötö ndê lau. Am gêmlihi lau yêc nom ɲagameŋ hoŋ, ma yêc lau titoŋ-titoŋ ma awha têtêŋ hoŋ naŋ sêmbo nom. ¹⁰ Ma am kôm ɲac sêti lau toŋ tigeŋ, bu sênem akiŋ yac neŋ Anötö sêtôm lau †dabuŋsiga, ma ɲac oc sênem gôliŋ sêmbo nom.”

¹¹ Têŋ dinaŋ aô galic ti gaŋgô aŋela daêsam ma daêsam ma daêsam, oc tôm dom bu dasê sa. ɲac sêŋgihi pôn atu ma aŋela hale ti lau bata ahuc. ¹² Ma ɲac sem wê ɲa awha atu bocdec bu, “O Domba ɲayham kêlêc, am naŋ lau sic am ndu. Yac ampîŋ am, bu am gêŋ hoŋ ɲadau, ma am nem ɲaclai, ti gauc, ma licwalô, ma waêm ti ɲawê ma ɲawasi atu hôc gêlêc su.”

¹³ Têŋ dinaŋ aô gaŋgô gêŋ tali hoŋ naŋ sêmbo undambê ti nom ma nom ɲapu-ɲga, ma naŋ sêmbo gwêc. ɲac hoŋ sem wê bocdec bu, “Kwahic dec, ma tôm bêc hoŋ, yac ampîŋ iŋ naŋ ndöc pôn atu, ma yac ampîŋ Domba. Bu iŋlu si waê, ti ɲawê ma ɲawasi, ma ɲaclai atu andô!” ¹⁴ Ma aŋela hale sêsôm, “Yomandô!” Ma lau bata hoŋ sêhu dau sêyêc nom ma sêmpiŋ iŋlu.

6

Anötö ndê Domba kac bapia tilhuŋ sa

¹ Dinaŋ su, goc aö galic Anötö ndê Domba dau kôc gêŋ ŋabalêp ŋamata-ŋga su yêc bapia tilhuŋ. Ma aŋela hale si daŋ ta yom ŋa awha atu gitôm wapap, ma sôm, “Mweŋ!” ² Dec aö taŋhê gameŋ, ma galic hosi sêsêp daŋ. Ma aö galic ŋgac naŋ ndöc hosi ŋahô, naŋ kôc bakôc sôp-ŋga daŋ. Anötö kêŋ sanem daŋ têŋ iŋ, goc iŋ sa ti ŋaclai atu bu ku ŋacyo dulu.

³ Goc Anötö ndê Domba kôc gêŋ ŋabalêp tilu-ŋga su, ma aö gaŋgô aŋela tilu-ŋga sôm, “Mweŋ!” ⁴ Ma hosi kokoc daŋ sa meŋ. Anötö kêŋ bien baliŋ daŋ têŋ ŋgac naŋ ndöc hosi ŋahô, ma kêŋ ŋaclai têŋ iŋ bu kôc yom malô su yêc lau nom-ŋga, bu kôm ŋac sêndic dandi ndu.

⁵ Goc Anötö ndê Domba kôc gêŋ ŋabalêp titö-ŋga su, ma aŋela titö-ŋga sôm, “Mweŋ!” Dec aö taŋhê gameŋ ma galic hosi yeyec daŋ. Ma ŋgac naŋ ndöc hosi ŋahô kôc gêŋ danem dôhôn gêŋ-ŋga yêc iŋ amba. Gêŋ kaiŋ dinaŋ dakôc bu danem dôhôn gêŋ bu ŋadehe me lolo. ⁶ Ma awha daŋ sa akêŋ pônŋ atu naŋ kalhac aŋela hale ŋalhu, naŋ sôm, “Kêŋ tôbôm sa bu lau nom-ŋga sêpônnda gêŋ sêneŋ-ŋga, ma ŋac oc sênem dôhôn gêŋ bu lau sênemlhi gêŋ daneŋ-ŋga ŋagec-ŋagec ŋa ŋaôli atu. Tigeŋ kôm ôm a ŋolib-ŋga ti ôm wain-ŋga tisac dom.”

⁷ Têŋ dinaŋ Anötö ndê Domba kôc gêŋ ŋabalêp tihale-ŋga su, ma aŋela tihale-ŋga sôm, “Mweŋ!” ⁸ Goc aö taŋhê gameŋ, ma galic hosi yaŋyaŋ daŋ. Ma ŋgac naŋ ndöc ŋahô, naŋ sêsam iŋ ndê ŋaê bu ‘Mbac Ndu,’ ma daŋ tiyham, naŋ ndê ŋaê ‘Lambwam’ kêkuc iŋ. Ma Anötö

kêkiŋ inlu bu sêwhê lau nom-ŋga hoŋ kôc ndi toŋ hale, ma sêndic toŋ daŋ ndu. Inlu oc sêŋgili siŋ, ma sêkêŋ tôbôm ma gêmbac atu ma bôclai bu sêseŋ lau toŋ tihale-ŋga dinaŋ su.

⁹ Têŋ ndoc Anötö ndê Domba kôc gêŋ ŋabalêp ti-5-ŋga su, naŋ galic lau ŋatô si gatu sêmbo Anötö ndê alta ŋapu. Lau dinaŋ, muŋ-ŋga lau nom-ŋga sic ŋac ndu, ŋahu bu sêkêŋ whiŋ Anötö ndê yom, ma sêhoc in ŋdê yom asê. ¹⁰ Ma ŋac sêta awha atu têt in, “O Pômdau Dabuŋ ma Yom Ŋandô Ŋadau. Têt bêc bocke am oc êmatôc lau sac nom-ŋga, ma kêt ŋagêyô têt ŋac ô yac mba dac naŋ ŋac sêkêc siŋ su?” ¹¹ Sêsôm yom dinaŋ su, ma Anötö kêt ŋakwê sêsêp baliŋ têt ŋac tôm gi. Ma in sôm têt ŋac bu, “Mac nem asidôwai ŋatô sem akiŋ aô sêmbo, naŋ lau nom-ŋga oc sêndic ŋac ndu gitôm ŋac sic mac ndu. Bocdinaŋ ahôŋ malô e gêt dinaŋ pacndê su.”

¹² Aô taŋhê Anötö ndê Domba ma in kôc gêt ŋabalêp ti-6-ŋga su, goc tiyhô atu gêm, ma aô galic ac tiyec gitôm sêcyâê, ma ayô tikoc gitôm dac. ¹³ Ma tata umbon-ŋga sêpeŋ sêsip nom gitôm mbu puc atu ma kêwic ahi goc ŋalôwê sêpeŋ sêsip nom si. ¹⁴ Ma umbon giŋga tôm mbu soc po daŋ su, ma lôc ti nduc hoŋ siŋga bocdinaŋ. ¹⁵ Tu dinaŋ-ŋga lau hoŋ naŋ sêkêŋ whiŋ Yisu dom, naŋ sêtôc dau ŋandô, ma sêŋsalê gameŋ bu sêsip dau. Kiŋ ma lau bata, ma lau siŋ-ŋga, ma lau ti lêlôm ma lau ti licwalô atu, ma lau naŋ sem akiŋ ŋadaui ti lau naŋ sêmbo ŋambwa, naŋ hoŋ sêlhô bambaliŋ. Ma sêŋsalê mala sêsip dau kwi-ŋga sêsôc hocsuŋ ti hoc naŋ

sêyêc gameŋ lôc-ŋga, naŋ ŋapu. ¹⁶ Ma ŋac sêta yom têŋ lôc ti hoc bu êŋgatôc ŋac si e iŋ naŋ ndöc pônŋ atu, naŋ oc tòm dom bu lic ŋac, ma bocdinaŋ ŋac oc sêtap Anötö ndê Domba ndê atac ŋandê sa dom. ¹⁷ Sêkôm gêŋ dinaŋ, ŋahu bu bêc dinaŋ ti bêc sêtap ŋandê sa tu ŋac si sac-ŋga, ma lau sac daŋ oc sêtôm dom bu sêŋlêc Anötö ndê matôc.

7

Sêpuc ŋadalô pi lau Israel-ŋga 144,000

¹ Dinaŋ su, goc aö galic aŋela hale naŋ sêyob mbu. Ŋac sêlhac nom ŋabatiŋ hale ma sêkôc ŋaclai bu sêlhac mbu nom-ŋga hale ahuc, tu bu sêpuc ŋadinda e sêkôm nom me gwêc me a tisac dom. ² Anötö kêŋ ŋaclai têŋ ŋac bu sêyob mbu e tiŋambu sêhu mbu nom-ŋga siŋ bu kôm nom ma gwêc tisac. Ma aö galic aŋela daŋ tiyham naŋ sa akêŋ gameŋ ac pi-ŋga meŋ, ma yêc iŋ amba iŋ kôc Anötö Tanlî Ŋadau ndê gêŋ dapuc ŋadalô-ŋga.* Iŋ mbwêc ŋa awha atu têŋ aŋela hale dinaŋ ma sôm, ³ “Akôm nom ti gwêc ma a tisac dom, e yac apuc yac neŋ Anötö ndê ŋadalô pi iŋ ndê lau akiŋ si sêcbala su.”

⁴ Iŋ sôm yom dinaŋ su, goc aö ganŋô lau naŋ sêpuc ŋadalô pi ŋac si sêcbala, naŋ si namba, naŋ gitôm 144,000. Ma lau dinaŋ sêmeŋ akêŋ lau Israel-ŋga si gôlôwac toŋ 12. ⁵ Yêc Juda ndê toŋ,

* **7:2** Têŋ têm dinaŋ lau sêkêŋ gêŋ ŋabalêp gitôm lêlêp me nomdac pi bapia bu sêsap dôŋ, ma sêpuc ŋadalô daŋ pi lêlêp dau bu tôc asê bu ŋac sêti bapia dau ŋadau. Sêmasaŋ gôlônŋ amanatu-ŋga (ring) me gêŋ daŋ naŋ sênônŋ ti kôm bu sêpuc ŋadalô dau.

sêkenj ñadalô pi lau 12,000, ma pi lau 12,000 yêc Ruben ndê, 12,000 yêc Gad ndê, ⁶ 12,000 yêc Aser ndê, 12,000 yêc Naptali ndê, 12,000 yêc Manase ndê, ⁷ 12,000 yêc Simeon ndê, 12,000 yêc Liwai ndê, 12,000 yêc Isaka ndê, ⁸ 12,000 yêc Sebulun ndê, 12,000 yêc Josep ndê, ma pi lau 12,000 yêc Benjamin ndê toj.

Lau daêsam sêmpinj Anötö

⁹ Tiñambu aö tañhê gamej ma galic lau daêsam andô, gitôm dom bu lau dañ sêsê ñac sa. Sêmenj akêj nom ñagamej hoj, ma akêj lau titoj-titoj hoj, ma akêj lau awha têtêtêj. Ma sêlhac pônj atu ti Anötö ndê Domba anjô andô-nga. Ñac hoj sêsôc ñakwê sêsêp, ma sêhóc tômtôm ñalauj. ¹⁰ Ma sêmbwêc ñanga bu, “Yac tampinj yac neñ Anötö nañ ndöc pônj atu, ma inj ndê Domba, bu mwasinj nem lau si-nga yêc injlu.”

¹¹ Ma anjela hoj nañ sêlhac sêngihi pônj atu ti anjela hale ma lau bata ahuc, nañ sêhu dau anjô sip nom sêyêc pônj atu ndö-nga. Ma sêmpinj Anötö, ¹² ma sêsôm, “Yomandô! Yac neñ Anötö ndê ñawasi ti gauc ma waê ti ñaclai ma licwalô hóc gêlêc gêj hoj su. Bocdinañ tampinj inj, ma danem danje inj kwahic dec ma tôm bêc hoj. Yomandô!”

¹³ Têj dinañ lau bata si dañ meñ ma ndac aö bocdec bu, “Lau ti ñakwê sêsêp dindê, ñac lau asa, ma sêmenj akêj nde?” ¹⁴ Ma aö gaô inj ndê awha ma gasôm, “O ñgac atu, am daôm kêyalê.” Dec inj sôm têtj aö, “Lau dinañ sêmbo nom têtj ndoc ñawapac atu hóc asê, ma kwahic dec sêmenj sêmbo lec. Sêngwasinj si ñakwê sip

Anötö ndê Domba ñadac, ma ñakwê dau sêp sambuc. ¹⁵ Tu dinan-nga sêlhac Anötö ndê pôn atu ndö-nga yêc in ndê lôm dabuñ, ma sem akin in acsalô ma ôbwêc. Ma in nan ndöc pôn atu, nan oc mbo whin ñac ma yob ñac. ¹⁶ Tôm dom bu sêpônnda gêñ sêneñ-nga ti sênôm-nga tiyham. Ma ac oc pec ñac dom, ma gêñ ñandê dan oc tap ñac sa dom. ¹⁷ Nahu bu Anötö ndê Domba nan mbo pôn atu ñalhu, nan oc ti ñac si ñgac yob ñac-nga, ma wê ñac sêsa bu sênôm bu yêc bubata tanli-nga. Ma Anötö dau oc puñ ñac tasulu su yêc ñac tandô.”

8

Anötö ndê Domba kôc gêñ ñabalêp ti-7-nga su

¹ Têñ dinan Anötö ndê Domba kôc gêñ ñabalêp ti-7-nga su yêc bapia, ma gameñ undambê-nga ñaneñ sa gitôm acgatu ñasawa danğa. ² Ma aö galic añela 7 nan sêlhac Anötö anğô-nga, ma in kêñ dahuc têt ñac hon tôm gi. ³ Ma añela dan tiyham meñ kalhac alta gol kêpin pôn atu. In kôc lôn gol dan, ma sêkêñ gêñ ñamalu ñayham daêsam têt in. Goc in kêgaluñ whin Anötö ndê lau dabuñ si mbec yêc lôn dau, ma kêc pi alta ti da têt Anötö. ⁴ Ma ñawasu akêñ gêñ ñamalu ti lau dabuñ si mbec, sa akêñ lôn nan yêc añela amba, ma pi têt Anötö anğô-nga. ⁵ Pacndê, goc in kôc ya ñanda akêñ alta, ma kêñ sip lôn gêñ ñamalu-nga e meñhu, ma tuc sip gameñ nom-nga gi. Ma aö ganğô ñakêcsia atu, ma sickac ti wapap gic ma tiyhô gêm.

Añela hale sêyu dahuc

6 Têñ dinan aņela 7 nañ sêkôc dahuc, nañ sêmasañ dau bu sêyu. 7 Aņela ñamata-ņga yu in ndê, ma sêmbaliñ u ñalhuc gitôm ais, ma ya nañ sêngaluñ whiñ dac nañ sip nom gi. Ma ya dau gêñ gameñ nom-ņga ti a daêsam su. Aõ galic gitôm sêwhê gameñ nom-ņga ti a hoñ kôc gi ñatoñ tö, ma toñ dañ ya gêñ su, ma lu sêyêc ñayham. Ma kwan batac-batac, nañ ya gêñ hoñ su.

8 Goc aņela tilu-ņga yu dahuc, ma sêmbaliñ gêñ dañ gitôm lôc atu ti ya sip gwêc gi. Ma tiyham aõ galic gitôm sêwhê gwêc kôc gi toñ tö, ma toñ dañ gêm dau kwi ti dac, ma toñ lu sêyêc ñayham. 9 Ma i ti gêñ tali hoñ nañ sêmbo gwêc ti dac, nañ sêmbac ndu. Ma wañ nañ sêpoc gwêc bocdinañ, toñ dañ siñga su, toñ lu sêpoc ñayham.

10 Têñ ndoc aņela titö-ņga yu ndê dahuc, nañ tata atu dañ peñ sip akêñ umbon. Tata dau ñawê atu, ma peñ sip nom ma kôm bu ti bubata daêsam sêtisac. Aõ galic gitôm sêwhê bu ti bubata hoñ kôc gi toñ tö, ma toñ dañ tisac. 11 Sêsam tata dau ñaê bu 'Ñamakic.' Ma yêc bu nom-ņga hoñ, toñ dañ ñamakic sa ma toñ lu sêyêc ñayham. Ma lau hoñ nañ sênôm bu ñamakic dinan, nañ sêmbac ndu.

12 Goc aņela tihale-ņga yu ndê dahuc, ma ac ti ayô ma tata ñatô sêtisac. Tu dinan-ņga têt aacsalô, ac pô gameñ gitôm acgatu ñasawa 8, ma ñasec sa gitôm acgatu ñasawa hale. Ma têt ôbwêc bocdinañ, ayô ti tata ñawê mba gitôm acgatu ñasawa hale.

13 Aö galic gêñ honj dinañ su, ma aö gangô macmponj dañ nañ hu mbo umboñ, ma tañ ña awha atu bocdec bu, “Oyaê! Oyaê! Oyaê! Añela hale sêyu dahuc su, ma añela tö sêmbo dôñ sêmbo. Bocdinañ mac lau nom-ñga oc atap ñawapac sa tiyham.”

9

Añela ti-5-ñga yu dahuc

1 Goc añela ti-5-ñga yu ndê dahuc, ma aö galic tata dañ peñ yêc umboñ sip nom gi. Ma Anötö kêñ ki têtj iñ bu yob suñ baliñ sac nañ sêsam bu Abis,* nañ ñagatam. 2 Goc iñ gêlêc gatam dau su, ma yawasu pi akêñ suñ baliñ dinañ meñ. Yawasu dau atu andô, gitôm yawasu têtj ndoc lau sêkêc pwa atu dañ. Yawasu dau gêm ac ahuc ma kôm umboñ ñasec sa. 3 Ma aö galic wakô sêsip akêñ yawasu sêmeñ. Ñac si ñaclai gitôm gapiñgap bu sêkêñ ñandê atu têtj lau nom-ñga. 4 Magoc Anötö gic yao ñac bu sêkôm kwanj ma gêñ batac-batac ma a tisac dom, ma sêkôm lau nañ añela sêpuc Anötö ndê ñadalô pi ñac sêcbala su, nañ sêtisac dom. Magoc lau ñatô, nañ wakô dinañ oc sêkôm ñac sêtisac. 5 Ñac sêkôc ñaclai bu sêkêñ ñandê atu têtj lau dinañ gitôm ayô 5, magoc ñac oc sêndic ñac ndu dom. Ma ñandê dau gitôm gapiñgap señ lau. 6 Têtj ndoc dinañ lau oc sêtec bu sêmbo tali. Ñac oc tac whiñ bu sêmbac ndu, tigeñ ñac oc sêmbo tali ma sêhóc ñandê ñapanj.

* **9:1** Ñaê ‘Abis’ (Abyss) kêkuc Yom Grik. Suñ baliñ dinañ ti ñalau sac si gapocwalô.

⁷ Aö galic wakô dinan sêtôm hosi nan sêmasan tu sêndic siŋ-nga. Gêŋ gitôm gulun gol sac nac si ŋagôlôn, ma nac si anğô gitôm ŋamalac. ⁸ Nac si kêclaun baliŋ gitôm lauwhê si, ma nac si ŋalhô atu gitôm layon si. ⁹ Ma yêc nac si ŋabapo aö galic gêŋ ŋanğa gitôm lautuc ain. Ma têtŋ ndoc nac sêhu sêmbo lôlôc, nac si ŋamakê ŋakêcsia atu gitôm hosi daêsam sêhê kaleta ma sênti bu sêndic siŋ. ¹⁰ Nac si ŋanğuc gitôm gapiŋgap si ŋanğuc bu sêtinŋ ŋamalac. Naclai atu yêc nac si ŋanğuc, bu sêkêŋ ŋandê têtŋ lau gitôm ayô amanğan. ¹¹ Nac si kiŋ in aŋela sac suŋ baliŋ-nga. Yêc Yom †Hibru sêsam in ndê ŋaê bu Abadon, ma yêc Yom Grik sêsam in bu Apolion.† ¹² Nawanpac dinan ti nawanpac ŋamata-nga. Ma nawanpac lu sêyêc dôn sêyêc.

Aŋela ti-6-nga yu dahuc

¹³ Têtŋ dinan aŋela ti-6-nga yu ndê dahuc. Ma aö ganğô awha dan sa akêŋ alta gol nan kalhac Anötö anğô-nga. Napo hale sêyêc alta dau ŋakêcsu hale, ma awha dau sa akêŋ napo dau ŋalhu, ¹⁴ ma ta yom têtŋ aŋela nan yu dahuc bocdec bu, “Sa têtŋ aŋela hale nan sêsô nac dôn sêmbo bu atu Yupretes, nan ndi, ma êmgapwêc nac su.” ¹⁵ Muŋ-nga Anötö kêyaliŋ ndoc dan sa bu aŋela hale dinan sêndic lau sac ndu, ma nac sêhônŋ ndoc dau sêmbo Bu Yupretes. Goc aŋela dau sa gi ma kêgapwêc aŋela hale dinan su, bu sêwhê lau nom-nga kôc ndi toŋ tö. Ma toŋ dan nac oc sêndic nac ndu, ma toŋ lu sêhu nac siŋ.

† **9:11** Abadon ma Apolion - ŋaê lu dinan ŋahu tigeŋ. Danem kwi bu ‘Ndic Ndu’ me ‘Seŋ su.’

16-17 Têñ dinan aö galic gêñ ñagatu dan, lau siñ-ñga daêsam kêlêc sêndöc hosi ñahô. Ma awha dan sam ñac si namba asê têtñ aö, nan gitôm 200 milien. Ma aö galic lautuc ñanğa sêyêc ñac ñabapo. Lautuc dinan ñadalô kokoc gitôm ya, ma ñamayan gitôm umbon, ma yanyan gitôm gêtñ ñandê ñaê †solpa. Ma aö galic hosi si ñagôlôn gitôm layon si, ma ya ti yawasu ma solpa sa akêtñ ñac si whasun. ¹⁸ Gêtñ tö dinan, ya ti yawahô ma solpa, nan sêsa hosi whasun nan tôm ñawapac atu bu señ lau nom-ñga ñatô su. Lau toñ dan oc sêmbac ndu, magoc toñ lu oc sêmba tali. ¹⁹ Hosi dinan sêkôc ñaclai atu yêc ñac si whasun, ma yêc ñac si ñanğuc whin. Bu ñac si ñanğuc gitôm mboc ñagôlôn bu señ lau ma kôm ñac sêtisac.

²⁰ Ñawapac tö dinan kôm lau toñ dan sêmbac ndu. Ma lau ñatô nan sêmbac ndu dom, nan sêlic su, magoc sem si ñalôm kwi dom. Mba! Ñac sêsap ñac si mêtê sac dôñ ñapan. Ñac sem akiñ ñalau sac ma anötöi gwam nan sêmasan ña gol ti silba ma brons ti hoc ma ña a. Gwam hon dinan gitôm dom bu sêlic gameñ me sêngô yom, ma sêñsêlêñ dom, tigen lau nom-ñga sem akiñ ñac ñapan. ²¹ Ma ñac sêkôm mêtê sac daêsam tôm sic ñamalac ndu, sêpec balö, sêkôm mêtê mockain-ñga, ma sem kan gêtñ. Ñac sêlic ñawapac dau, magoc sem dau kwi dom, ñac sêsap si mêtê sac dinan dôñ ñapan.

10

Anela kêtñ bapia saun dan têtñ Jon

¹ Têñ dinan̄ aö galic aņela naņga daņ sip akêñ undambê meņ. In̄ ndê ñakwê gitôm dao, ma gasuņ bu êp daņ yêc in̄ ñagôlôn̄ ñahô-ņga. In̄ ndê aņgô andô ñawasi gitôm ac, ma in̄ gahi gitôm alhö ti ya. ² Ma in̄ kôc bapia sauņ daņ naņ kac sa su, yêc in̄ amba. In̄ sip gi ma kêñ gahi gasê-ņga kalhac nom, ma gahi andô-ņga kalhac gwêc. ³ Ma in̄ mbwêc naņga, gitôm layon daņ taņ. Têñ ndoc in̄ mbwêc, naņ aö gaņgô awha 7 sêta yom, naņ ñakêcsia gitôm wapap gic. ⁴ Aö gaņgô awha 7 dinan̄ su, ma bu wato ñac si yom sip bapia, tigeņ awha daņ akêñ undambê sôm têñ aö bu, “To yom naņ am ñgô akêñ awha wapap-ņga 7, naņ dom. Mba! Kôc dôn̄ ma sêc ahuc yêc am-ņga.”

⁵ Goc aņela naņ kalhac nom ti gwêc, naņ tôc in̄ amba andô-ņga pi undambê. ⁶ In̄ bu sôm yom ma puc dôn̄ ña Anötö ndê ñaê, dec sôm, “Aö wasôm yom ñandô yêc in̄ naņ mbo tali ñapaņ, naņ aņgô-ņga, in̄ naņ kêñ undambê ma nom ti gwêc, ma gêñ hoņ naņ sêmbo gameņ dinan̄. Dahôn̄ têm daņ tiyham dom, ⁷ bu gêñ hoņ naņ Anötö kêmatiņ tidôn̄ muņ su, ma yêc siņ dau e meņ têñ kwahic dec, naņ oc meņ sa tiawê. Têñ bêc naņ aņela ti-7-ņga yu dahuc, naņ gêñ hoņ dinan̄ oc ñandô sa tôm in̄ hoc asê gwanaņ su têñ lau propet naņ sem akiņ in̄.”

⁸ Dinan̄ su, goc awha akêñ undambê naņ aö gaņgô su, naņ sôm yom têñ aö tiyham bocdec bu, “Am sa têñ aņela naņ kalhac nom ma gwêc, naņ ndi, ma kôc bapia naņ kac sa yêc in̄ amba, naņ su.” ⁹ Bocdinan̄ aö gatêñ aņela dau ga, ma

gandac bapia sauñ dinañ. Ma inñ sôm têtñ aö, “Am kôc su, ma neñ. Yêc whamsuñ am oc êmsahê ñaganda gitôm lêp. Tigeñ bapia dau oc kôm am nem ñatac yham dom.” ¹⁰ Aö gakôc bapia sauñ dau su yêc inñ amba, ma gañ. Yêc whañsuñ aö kasahê bu ñaganda gitôm lêp, tigeñ tiñambu sip aö ñatac gi ma kôm aö ñatac yham dom. ¹¹ Goc Anötö sôm têtñ aö, “Am oc hoc yom asê tiyham gitôm propet, ma sôm yom pi lau daêsam, pi lau titoñ-titoñ ma lau awha têtñtêtñ, ma pi kiñ sêwhiñ.”

11

Anötö ndê propet lu

¹ Dinañ su, goc Anötö kêtñ gakoc baliñ dañ têtñ aö bu wanem dôhônñ gêtñ. Ma inñ sôm têtñ aö, “Am ndi, ma nem dôhônñ aneñ lôm dabuñ, ma alta nañ kalhac dê. Ma lau nañ sêtoc aö sa ma sêteñ mbec têtñ aö sêmbo dindê, nañ sê ñac sa. ² Tigeñ nem dôhônñ gameñ yêc lôm dabuñ ñabatêmndö dom, bu aö gakêtñ gameñ dinañ têtñ lau sambuc ti ñac si gameñ. Ma ñac oc sênem gôliñ aneñ malac dabuñ, ma sêtñgwiniñ aneñ lau gitôm ayô 42. ³ Magoc aö wakêtñ ñaclai têtñ aneñ propet lu, dec inñlu oc sêsôc ñakwê yeyec ma sêsôm aneñ yom asê gitôm bêc 1,260.”

⁴ Propet lu dau sêlhac Pômdau, nañ gêm gôliñ nom sambuc, nañ aᅅgô-ᅅga, sêtôm a olib lu, ma sêtôm yakaiñ lu. ⁵ Lau nañ bu sêkôm inñlu ña yom, nañ oc sêmbac ndu ñalêtñ bocdec. Ya oc sa yêc inñlu whasuñ ma neñ ñac su. ⁶ Ma têtñ ndoc sêhoc Anötö ndê yom asê, nañ sêkôc ñaclai bu

sêsôm u ndic dom yêc umbonj. Ma sêkôc ñaclai bu sênem bu kwi ti dac, ma bu sêkêñ ñawapac tidau-tidau têtj lau nom-nga têtj ndoc bocke nanj inlu atac whinj nanj.

⁷ Têtj inlu si têtj sêhoc Anötö ndê yom asê-nga pacndê su, nanj aö galic bu gêtj sac danj pi akêtj sunj baliñ sac dinanj menj, ma gic sinj têtj inlu. Ma inj ku inlu dulu ma gic inj ndu. ⁸ Ma inlu si ñamlanj sêyêc ñambwa sêyêc malac atu dau ña-malac lôm. Yêc malac atu dau lau sic inj si Pômdau ndu pi a gicso dau, ma bocdinañ lau ñatô sem malac dau ñaê kwi ma sêsam bu Sodom ma Isip. ⁹ Têtj dinanj, lau akêtj nom ñagamenj honj, ma akêtj lau titoñ-titoñ ma awha têtjtêtj honj tahê inj si ñamlanj gitôm bêc tö ma ñadanga. Ma ñac sêkêñ yao bu lau danj sêñsuhunj inj dom. ¹⁰ Lau sac nom-nga sêtisambuc bu inj sêmbac ndu, ma ñac sêkêñ gêtj ñayham-ñayham têtj dandi ti atac ñayham atu. Nahu bu mun-nga propet lu dinanj sêkêñ ñawapac têtj ñac.

¹¹ Aö galic bu inj sêyêc boc-dinanj tôm bêc tö ma ñadanga, goc Anötö kêtj inj ndê wayahô tali-nga têtj inj dec sêtisa tiyham ma sêlhac. Ma lau honj nanj sêlic, nanj sêtöc dau ñandô. ¹² Ma aö ganğô Anötö ta yom awha atu têtj inj ma sôm bu sêpi sa sêtêtj inj sêmenj. Goc dao danj kôc inj sa sêpi undambê si, ma inj si ñacyo sêlic. ¹³ Têtj têtj dinanj tiyhô atu gêm, ma malac atu dau ñagamenj ñatô sêtisac. Gitôm sêwhê malac dau kôc ti gamenj 10, ma gamenj 9 sêyêc ñayham, ma gamenj ti-10-nga tisac. Ma lau 7,000 sêmbac

ndu. Gêñ dau kôm lau nañ sêmbô tali, nañ sêtöc dau atu, ma sêtoc Anötö undambê-nga ndê waê ti ñaclai atu sa.

¹⁴ Dinañ ti ñawapac tilu-nga, ma titö-nga kêpiñ bu hôc asê.

Dahuc ti-7-nga tañ

¹⁵ Têñ dinañ añela ti-7-nga yu dahuc, ma aö gangô awha daêsam sêta yom ñanga yêc undambê bocdec bu, “Kwahic dec yac neñ Pômdau lu iñ ndê Mesaya sem gôliñ nom ñagamen sambuc. Ma gôliñ dau oc pacndê dom.”

¹⁶ Ma lau bata 24 nañ sêndöc ñac si pôn yêc Anötö añgô-nga, nañ sêhu dau añgô sip nom, ma sêmpin iñ, ¹⁷ ma sêsôm, “O Pômdau Anötö Ñaclai Ñadau, am nañ mbo têtñ ñamata-nga, ma kwahic dec mbo. Yac bu anem danje am bu am gêm gôliñ nom ti am nem ñaclai atu. ¹⁸ Lau nom-nga atac ñandê sa, magoc kwahic dec ñac oc sêñsahê am nem atac ñandê. Ndoc meñ su, bu am êmsahê lau nañ sêmbac ndu su. Ma am oc kêñ ñagêyô ñayham têtñ lau hoñ nañ sem akin am, lau propet ti am nem lau dabuñ, ma têtñ lau hoñ nañ sêtoc nem ñaê sa, lau tiwaê, ma lau waêmba sêwhiñ. Tigen lau nañ sêkôm nom tisac, nañ am oc señ ñac su.”

¹⁹ Ñac sêmpin Anötö su, goc gatam yêc Anötö ndê lôm dabuñ undambê-nga kac sa, ma aö galic apa Anötö ndê pwac dabuñ-nga yêc lôm dabuñ ñalôm. Ma sickac ti wapap gic, ma aö gangô ñantiñ atu, ma tiyhô gêm ma u gic ñalhuc atu ma ñanga gitôm ais.

12

Awhê dan, ma Akô

¹ Têñ dinañ gêñ dalô atu dan hóc asê yêc undambê, ma kôm aö gasö. Aö galic awhê dan, ma ac kêgihi in ahuc gitôm ñakwê. Ayô yêc in gahi ñapu, ma tata 12 sac in ñagôlôn gitôm kin si sanem. ² Awhê dau daê, ma in ndê ndoc kôc balêkoc-nga meñ sa. Tu dinañ-nga dec in kêsahê ñandê atu, ma tañ asê. ³ Ma gêñ dalô dan tiyham hóc asê yêc undambê. Aö galic gêñ kokoc atu gitôm akô dan. In ndê ñagôlôn 7, ma ñapo 10. Ma sanem kin-nga 7 sac in ndê ñagôlôn 7. ⁴ Ma in ndê ñanguc gic tata umbon-nga daêsam sa, ma kêbalip ñac sêsip nom si. Tata toñ lu gacgeñ sêlhac umbon, ma toñ dan in kêbalip sip nom gi. Goc in gi kalhac awhê dau aňgô-nga, ma hön bu in kôc balêkoc su, goc in neñ.

⁵ Ma awhê dau kôc balêkoc ñac* dan. In ñac nañ oc nem gôlin lau nom-nga hon ti ñaclai atu, gitôm in kôc tôc kin-nga ain tu êmatôc ñac-nga. Akô tac whin bu neñ balêkoc dau, tigen gitôm dom. Nahu bu sêngaho balêkoc dau su pi undambê gi, bu mbo whin Anötö nañ ndoc pôn atu. ⁶ Ma balê dinda kölhö kêtî gi mbo gameñ sawa. Anötö kêyalin gameñ sa gwanan yêc dindê, bu yob awhê dau gitôm bêc 1,260.

⁷ Têñ dinañ aö galic sin atu yêc undambê. Anötö ndê aňela ñamata-nga Maikel ti in ndê

* **12:5** Awhê dinañ in ti dôhôn Anötö ndê lau. Ma balê dau Yisu. Ma akô dinañ in ti dôhôn Sadañ. In kêsahê bu señ Yisu su magoc gitôm dom. Dec tinambu in kêñ kisa Yisu ndê lau, magoc Anötö yob ñac.

aņela sic siņ tēņ akô, ma akô ti ndê aņela sac sic siņ ô. ⁸ Magoc akô ndê ņaclai gitôm dom, dec iņ ti ndê aņela sac si mala sêmbu undambê-ņga mba. ⁹ Anötö ndê aņela sêsoc ņac su ma sêmbaliņ ņac sêsip nom si. Iņ akô akwa dinaņ, naņ dasam iņ ndê ņaê bu Sadaņ me ņgac yeyec. Iņ êlê mê kêsau lau nom-ņga ma kêtôm ņac bu sêkôm mêtê sac.

¹⁰ Tēņ ndoc dinaņ aö gaņgô awha atu daņ yêc undambê, naņ sôm, “Kwahic dec Anötö ndê ndoc bu nem gôliņ nom sambuc-ņga, naņ hóc asê su, ma iņ tóc iņ ndê ņaclai asê yêc awê. Iņ ndê gwelen nem lau si-ņga kwahic dec ņandô sa, ma lau hoņ oc sêlic †Mesaya ndê ņaclai. Tēņ ņamata-ņga Sadaņ kalhac Anötö aņgô-ņga tēņ acsalô ma ôbwêc hoņ, ma kêgôliņ yom pi yac neņ asidôwai. Magoc kwahic dec Anötö kêmasuc iņ su yêc undambê. ¹¹ Dac naņ Anötö ndê Domba kêc siņ, naņ puc yac neņ asidôwai dôn, ma sêhoc Anötö ndê yom ņandô asê. Ma tu dinaņ-ņga ņac sêku Sadaņ dulu. Sêlhac ņaņga ma sêtóc dau dom bu lau sêndic ņac ndu.

¹² Bocdinaņ mac lau undambê-ņga, atac ņayham ma atisambuc. Tigeņ ņawapac atu gic mac lau nom ti gwêc-ņga ņawaê. Oyaê. Sadaņ sip tēņ mac meņ, ma iņ tac ņandê atu andô. Ⱥahu bu iņ kêyalê bu iņ ndê tēm tiapê su.”

¹³ Tēņ ndoc akô gêlic bu sêsoc iņ su sip nom gi, naņ iņ gic hu kêbulu awhê naņ kôc balêkoc ņgac naņ. ¹⁴ Tigeņ Anötö kêņ ņamakê lu tēņ awhê dau gitôm macmpon atu daņ ndê, bu hu sa ndi mbo iņ ndê mala naņ Anötö kêyaliņ sa su yêc gameņ sawa. Yêc dinaņ Anötö oc yob iņ tôm yala tö

ma ayô 6, bu akô dau kôm in̄ tisac dom. ¹⁵ Têñ dinañ akô kac whasuñ sa ma guluc bu atu sa bu hêc awê dau su. ¹⁶ Magoc Anötö gêm awê dau sa ma kôm nom hêc kôc, e bu nañ sa akêñ akô whasuñ nañ sip nom ñalôm gi. ¹⁷ Têñ dinañ akô tac ñandê têñ awê dau, ma hu in̄ siñ sa gi, bu ndic siñ têñ in̄ ndê lau wakuc ñatô. Ñac lau nañ dañga wambu Anötö ndê yomsu ti sêsap Yisu ndê yom ñandô dôñ. ¹⁸ M a akô dau gi kalhac kêpiñ gwêc ñadali.

13

Gêñ sac atu dañ pi akêñ gwêc ñalôm meñ

¹ Ma aö galic gêñ sac atu dañ pi akêñ gwêc ñalôm meñ. In̄ ndê ñagôlôn̄ 7, ma ñapo 10, ma sanem 10 sac ñapo ñahô tôm gi. Ma aö galic ñaê sac sambuc 7 sêyêc in̄ ndê ñagôlôn̄ 7 dinañ. ² Gêñ sac dau ña-angô gitôm pôsip pôm atu ñaê lepat, ma gahi gitôm bea ndê, ma whasuñ atu gitôm layon ndê. Ma akô nañ kalhac gwêc ñadali, nañ kêñ ndê ñaclai ti licwalô têñ gêñ sac dinañ, bu nem gôliñ lau sac nem in̄ angô. ³ Aö galic gamboc atu yêc gêñ sac ndê ñagôlôn̄ dañ, nañ gitôm sic in̄ ndu su, magoc gêñ dau tisa ma ñayham sa tiyham. Lau sac nom-nga hoñ nañ sêlic gêñ dau, nañ sêhêdaê ma sêñkuc gêñ sac dau. ⁴ Ma sêlic bu akô kêñ in̄ ndê ñaclai têñ gêñ sac, dec ñac sêtoc akô sa ma sem akiñ in̄, ma sem akiñ gêñ sac dau whiñ. Ma sêsôm têñ dandi, “Aluê! Gêñ sac dinañ hêc gêlêc gêñ hoñ su. Ñamalac dañ gitôm dom bu ndic siñ têñ in̄!”

⁵ Gêñ sac dau kôc ñaclai bu sôm yom toc dau sa-nga ma yom sac-sac gitôm ayô 42. ⁶ Dec gêñ sac dau kac whasuñ sa bu sôm yom sac s ambuc pi Anötö, ma pi in ndê ñaê, ma pi undambê, ma pi lau nañ sêndöc undambê whiñ. ⁷ Ma in kôc ñaclai bu ndic siñ têtñ Anötö ndê lau dabuñ ma ku ñac dulu. In kôc ñaclai atu bu nem göliñ lau hoñ, lau akêñ nom ñagameñ hoñ, ma akêñ lau titoñ-titoñ, ma awha têtñtêtñ. ⁸ Ma lau nom-nga hoñ nañ si ñaê yêc Buku Tañli-nga dom, nañ oc sêtoc gêñ sac sa ma sênem akiñ in. Anötö ndê Domba yob Buku Tañli-nga dau. In Domba nañ nom dindéc mbasi eñ, ma Anötö kêyalin in sa ma kêyalê bu tiñambu, lau oc sêndic in ndu.

⁹ Asa ndê dangasuñ bu yêc, nañ ngô yom dindéc. ¹⁰ Yomandô! Ñawapac daêsam oc sêhóc asê. Lau ñatô sic ñawaê bu sêndöc gapocwalô, ma ñatô oc sêndic ñac ndu ña bien baliñ. Bociñañ mac lau dabuñ, alhac ñaंगा ma ahu nem akêñ whiñ siñ dom.

Gêñ sac tilu-nga pi sa akêñ nom ñalôm

¹¹ Têtñ dinañ aö galic gêñ sac dañ tiyham pi sa akêñ nom ñalôm meñ. In ndê ñapo sauñ lu, gitôm domba ñatu dañ ndê. Magoc in ndê awha atu gitôm layon ndê. ¹² Gêñ sac ñamata-nga nañ sic in pi ñagôlôn magoc ñayham sa tiyham, nañ kêñ ndê ñaclai atu têtñ gêñ sac tilu-nga dinañ, dec in gêm göliñ gêm in aňgô, ma kêgilí lau nom-nga hoñ bu sênem akiñ gêñ sac ñamata-nga dinañ. ¹³ Ma gêñ sac tilu-nga kôm gêñ dalô atu-tu. In sôm, ma ya sip akêñ undambê meñ, ma lau hoñ sêlic. ¹⁴ In kôc ñaclai bu kôm gêñ

dalô nem gêṅ sac ṅamata-ṅga aṅgô, gêṅ sac naṅ sic iṅ ṅa bienṅ baliṅ, magoc mbo tali. Bocdinaṅ iṅ kôm gêṅ dalô ma kêsau lau nom-ṅga naṅ sêkêṅ whiṅ Yisu dom, ma kêṅ yatu têṅ ṅac bu sêmasaṅ gêṅ sac ṅamata-ṅga ndê ṅagatu. ¹⁵ Ma iṅ kôc ṅaclai bu yu wayahô sôc gêṅ ṅagatu, dec gêṅ dau sôm yom asê. Ma lau naṅ sem akiṅ gêṅ ṅagatu dom, dec iṅ gic ṅac ndu. ¹⁶ Iṅ kac lau hoṅ ma sôm ṅaṅga bu sêkôc ṅadalô daṅ pi ṅac si amba andô-ṅga me pi ṅac si sêcbala. Lau tiwaê ma lau waêm̄ba, lau ti lêlôm ma lau ṅalôm sawa, lau naṅ sem akiṅ ṅadaui ti lau naṅ sêmbo ṅambwa, lau hoṅ iṅ kac ṅac bu sêkôc ṅadalô dinaṅ. ¹⁷ Ma iṅ gic yao bu asa naṅ kôc ṅadalô dom, naṅ gitôm dom bu nemlhi gêṅ, ma gitôm dom bu kêṅ gêṅ têṅ lau bu sênemlhi. Ma ṅadalô dau dinaṅ, iṅ gêṅ sac ṅamata-ṅga ndê ṅaê me ṅaê ṅanamba.

¹⁸ Gêṅ sac ṅanamba dau ṅahu yêc siṅ dau. Asa naṅ ṅamalac ti gauc atu, naṅ êṅsahê bu kip namba dau ṅahu sa. Namba dau iṅ ṅamalac daṅ ndê namba, ma iṅ ndê namba 666.

14

Jon gêlic Anötö ndê Domba ti iṅ ndê lau

¹ Tiṅambu aô galic Anötö ndê Domba kalhac Lôc †Sayon. Ma lau 144,000 naṅ iṅlu damba si ṅaê kalhac ṅac si sêcbala, naṅ sêlhac sêwhiṅ iṅ. ² Ma aô gaṅgô awha daṅ sa akêṅ undambê. Awha dau gitôm bu hêc ṅakêcsia, ma gitôm wapap naṅ gic atu, ma gitôm hap naṅ lau wê-ṅga sic. ³ Lau 144,000 dinaṅ sêlhac pônṅ atu, ti aṅela

atu hale ma lau bata 24 si anğô-nga, ma sem wê wakuc dan. Anötö gêm lau dinañ si yêc ñamalac nom-nga hoñ ñalôm, ma ñac tawasê sênjalê wê dau. ⁴ Ñac lau dinañ sem dabuñ dau ñapep, ma mêtê sac nañ kôm ñamalac ñadômbwi sa yêc Anötö anğô-nga,* nañ sêkôm dan dom. Gameñ bocke nañ Anötö ndê Domba bu ndi, nañ ñac sênkuc in. Domba dau gêmlihi ñac su yêc ñamalac nom-nga, ma kêñ ñac sêlhac inlu Anötö anğô-nga gitôm gêñ ñandô mbêc. ⁵ Ñac sêsôm yom tasan dan dom, ma ñac si giso mbasi.

Añela tö si yom

⁶ Aö tanhê gameñ tiyham ma galic añela dan hu mbo umbon, nañ kôc ñawaê ñayham bu hoc asê têtñ lau yêc nom ñagameñ hoñ, ma têtñ lau titoñ-titoñ ma awha têtñtêtñ hoñ. Ñawaê ñayham dau oc yêc ñapañ, ma oc pacndê dom. ⁷ In sôm ña awha atu, “Atoc Anötö sa ma anem akiñ in, bu in kêñ undambê ti nom, ma gwêc ti bubata hoñ. Ma kwahic dec in ndê ndoc êmatôc lau-nga meñ sa su. Bocdinañ atôc in, ma apo in ndê waê sa.”

⁸ Dinañ su, ma añela tilu-nga meñ ma sôm, “Malac atu Babilon† tisac su. Anğô su nañ!

* **14:4** Jon to yom ma sôm bu lau dau sêyêc sêwhiñ lauwhê dom, dec sêmo ñawasi yêc Anötö anğô-nga. Magoc lau tigauc daêsam gauc gêm bu yom dau hêganôn mêtê sac tidau-tidau nañ kôm ñamalac ñadômbwi sa yêc Anötö anğô-nga. Awhê lu ñac nañ sem dau su, nañ bu sêyêc sêwhiñ dau, dec Anötö oc lic sac dom. † **14:8** Tinambu Jon to yom pi malac atu Babilon, ma gêm dôhôn in pi awhê mockaiñ-nga dan. Asam yêc Rev 17-19, ma alic footnote yêc Rev 17:1.

Babilon tisac sambuc. In hu Anötö siŋ ma kôm mêtê sac, ma hê lau daêsam sêsa in ndê lêŋ sac sêŋkuc in, e ŋac si gauc timboloc tôm lau naŋ sênôm wain ma kêŋin ŋac.”

⁹ Ma aö galic aŋela titö-ŋga meŋ kêkuc aŋela lu dinaŋ, ma in sôm ŋa awha atu, “Mac lau hoŋ naŋ atoc gêŋ sac ma in ndê ŋagatu sa, ma akôc in ndê ŋadalô pi nem sêmbalam me amam, naŋ aŋgô. ¹⁰ Mac oc aŋsahê Anötö ndê atac ŋandê. Yomandô! In ndê atac ŋandê atu gitôm wain ŋaŋga naŋ in kêc sip laclu bu mac anôm. Mac oc alhac Anötö ndê Domba ma aŋela dabuŋ aŋgô-ŋga, ma atap nem ŋagêyô sac sa. Gêŋ ŋandê solpa ma ya oc kêŋ ŋandê atu têt mac. ¹¹ Y omandô! Lau hoŋ naŋ sem akiŋ gêŋ sac me in ndê ŋagatu, ma sêkôc in ndê ŋaê ŋanamba pi ŋac si ŋamlic, naŋ oc sêtap ŋawapac atu dinaŋ sa. Gameŋ naŋ ŋac sêmbo, naŋ yawasu oc pi ŋapaŋ, ma oc pacndê dom. Ŋac oc sêŋsahê ŋandê atu dau tôm acsalô ti ôbwêc hoŋ, ma ŋac oc sêŋwhaŋ dau dom.”

¹² Yom dec kêŋ puc mac lau naŋ daŋam wambu Anötö ndê yomsu ma akêŋ whiŋ Yisu. Alhac ŋaŋga, ma ahu nem akêŋ whiŋ siŋ dom!

¹³ Dinaŋ su, goc aö gaŋgô awha daŋ sa akêŋ undambê, naŋ sôm têt aö bu, “To yom bocdin-dec. Têt kwahic dec ma ndi, lau hoŋ naŋ sêsap si sêkêŋ whiŋ Pômdau dôn e sêmbac ndu, naŋ oc sêtap Anötö ndê mwasin atu sa.” Ma Ŋalau Dabuŋ sôm, “Yomandô! Ŋac oc sêŋwhaŋ dau yêc gwelen naŋ sêlhac ŋaŋga ma sêkôm. Ma ŋac

si gwelen ɲa-ɲandô oc êɲkuc ɲac pi undambê ndi.”

Anötö ndê aɲela sic gêɲ ɲandô nom-ɲga sa

¹⁴ Têɲ dinaɲ aö galic dao sêsêp daɲ, ma ɲamalac daɲ gitôm ɲamalac ndê Atu ndöc dao ɲahô. Sanem gol daɲ sac in ɲagôlôn, ma in kôc bien mbwê-alö ma ɲamata sac andô. ¹⁵ Ma aɲela daɲ sa akêɲ Anötö ndê lôm dabuɲ, ma ta yom awha atu têt in naɲ ndöc dao ɲahô bocdec bu, “Kwahic dec ôm nom-ɲga ɲandô sa, ma gêɲ hoɲ tilôwê su. Bocdinaɲ dec kôc nem bien sa ndi, ma ndic gêɲ ɲandô sa pitigen.” ¹⁶ Dec in naɲ ndöc dao ɲahô, naɲ sip têt nom gi, ma tim gêɲ ɲandô nom-ɲga ɲa in ndê bien dinaɲ, goc gic hoɲ sa sêpitigen.

¹⁷ Ma aɲela daɲ tiyham sa akêɲ lôm dabuɲ undambê-ɲga meɲ, naɲ kôc bien mbwê-alö daɲ ɲamata sac andô. ¹⁸ Ma aɲela daɲ tiyham naɲ yob ya yêc Anötö ndê alta, naɲ sa meɲ, ma mbwêc awha atu têt aɲela naɲ hêc bien ɲamata bu, “Kôc nem bien, ma sôc ôm wain-ɲga naɲ yêc nom, naɲ ndi, ma ndic wain ɲandô sa. Bu wain ɲandô kwahic dec ɲalôwê sa su.” ¹⁹ Dec aɲela dau sip nom gi ma tim wain ɲandô nom-ɲga ɲa in ndê bien. Ma in gic sa pi gameɲ sênem kiɲ wain ɲakwi-ɲga. Gêɲ dinaɲ ti dôhôn Anötö ndê atac ɲandê pi lau sac nom-ɲga. ²⁰ Ma aö galic bu sem kiɲ wain ɲandô nom-ɲga dinaɲ yêc malac atu ɲamakê. Ma dac atu sa meɲ, ma hêc sa ɲasawa baliɲ gitôm 300 kilometa, ma suɲ ɲagapon ɲatu. ɲagapon dau, hosi daɲ bu lom, dec oc meɲ têt in tôkwa.

15

Aņela 7 ma ņawapac 7

¹ Dinaņ su, ma aō galic gēņ dalô atu daņ tiyham yêc undambê, dec gasö ņandô. Aņela 7 sêkôc ņawapac atu 7 bu sêkêņ pi lau sac nom-ņga, naņ ti ņawapac ņambu-ņga naņ Anötö oc kēņ. Bu ņawapac 7 dinaņ oc ndic dabiņ iņ ndê atac ņandê pi lau nom-ņga e nom ņatêm pacndê.

² Ma aō galic gēņ daņ gitôm gwêc naņ ņawa gitôm glas, ma ya yêc ņalôm. Ma lau naņ sêku gēņ sac atu d ulu, naņ sêlhac gwêc dau ņamakê. ҆ac lau naņ sêtec bu sênem akiņ gēņ sac dau me sêtoc iņ ndê ņagatu sa, ma sêkôc iņ ndê ņaê ņanamba dom, ma ņalêņ dau dec sêku iņ dulu. ҆ac sêkôc gēņ wê-ņga ņaê hap naņ Anötö dau kēņ tēņ ņac. ³ Ma ņac sem Anötö ndê ņgac akiņ Moses ndê wê ma Anötö ndê Domba ndê wê. ҆ac sem bocdec, “O Pômdau Anötö ҆aņga. Am kôm gēņ atu-tu ti gēņ ņayham daêsam. O Kiņ atu, naņ gêm gôliņ nem lau tôm têm hoņ, am nem lêņ iņ lêņ ņandô ma gitêņ eņ. ⁴ O Pômdau, am tigeņ dabuņ. Bocdinaņ solop bu lau hoņ sêtöc am, ma sêtoc am nem waêm sa. Lau akêņ gameņ hoņ oc sêmeņ ma sênem akiņ am, bu kwahic dec sêlic yêc awê bu am kôm gēņ hoņ ņalêņ gitêņ eņ.”

⁵ Dinaņ su, ma aō galic lau Israel-ņga si †bac dabuņ ņagatam kac sa yêc undambê. Bac dau ti lau Israel-ņga si lôm dabuņ yêc gameņ sawa, naņ sêkêņ Anötö ndê yomsu yêc ņalôm. ⁶ Ma aņela 7 sêsa akêņ lôm dabuņ dau sêmeņ, ma sêkôc ņawapac atu 7. ҆ac sêsôc ņakwê ņawasi

sêsêp, ma sêkic po gol kêgihi ñac ñabapo. ⁷ Ma aņela atu hale si daņ kôc sùc 7 naņ sêmasaņ ña gol, ma kêņ têņ aņela 7 dinaņ. Anötö naņ mbo tali ñapaņ, naņ kêņ ñawapac tidau-tidau naņ tôc iņ ndê atac ñandê asê, naņ sip sùc 7 dinaņ e meņhu. ⁸ Têņ dinaņ yawasu atu naņ meņ akêņ Anötö ndê ñawasi ti licwalô, naņ gêm lôm dabuņ ñalôm ahuc. Ma tu dinaņ-ņga gitôm dom bu lau daņ sêsôc lôm dabuņ sêndi e aņela 7 sêndic dabiņ si gwelen sêkêņ ñawapac 7-ņga dinaņ pacndê.

16

Sùc ñawapac-ņga 7

¹ Têņ dinaņ aô gangô awha atu daņ yêc lôm dabuņ ta yom têņ aņela 7 dinaņ bocdec bu, “Andi, ma ñawapac tôc Anötö ndê atac ñandê asê-ņga naņ yêc mac nem sùc, naņ atac sa sip nom ndi.”

² Dec aņela ñamata-ņga tisa ma pô iņ ndê sùc tuc, ma kêņ ñawapac daņ sip nom gi. Ma lau naņ sêkôc gêņ sac ndê ñadalô ma sêpôn haduc têņ iņ ndê ñagatu, naņ gamboc andô gêm ñac ahuc ma sêņsahê ñandê atu.

³ Goc aņela tilu-ņga pô iņ ndê sùc tuc sip gwêc, ma gwêc gêm dau kwi ti dac yeyec gitôm ñgac batê daņ ndê dac. Ma gêņ tali gwêc-ņga hoņ sêmbac ndu.

⁴ Aņela titö-ņga pô iņ ndê sùc tuc sip bu ti bubata, dec sêti dac. ⁵ Ma aô gangô aņela naņ yob bu, naņ sôm, “O Pômdau dabuņ ñandô, am naņ mbo têņ ñamata-ņga, ma kwahic dec mbo. Am kêmatôc lau, ma kêņ ñagêyô têņ ñac ñalêņ

gitên. ⁶ Nahu bu lau dinan sêkêc am nem lau propet ti lau dabun si dac sin. Ma kwahic dec am kêñ dac têt ñac sênôm. Ñagêyô dau gic ñac ñawaê solop.” ⁷ In sôm yom dinan su, goc aö gangô awha dan sa akên alta, nan ô yom ma sôm, “Aêc, Pômdau Anötö Ñaclai Ñadau. Am kêkuc yom ñandô ma kêmatôc lau, ma kêñ ñagêyô solop têt ñac.”

⁸ Têt dinan añela tihale-nga pô in ndê sùc tuc pi ac, dec ac pec lau nom-nga gitôm ya gêt ñac. ⁹ Ñac sêñsahê ñandê atu ma sêtisac ñandô. Magoc ñac si ñalôm ñadandi ma ñac sem dau kwi dom, ma sêtoc Anötö nan kêñ ñawapac dau têt ñac, nan sa dom. Mba! Ñac sêsôm yom sac sambuc pi in ndê ñaê.

¹⁰⁻¹¹ Goc añela ti-5-nga pô in ndê sùc tuc pi gêt sac ndê pôn atu, ma gameñ hon nan gêt sac gêm gôlin, nan ñasec sa. Gamboc sac daêsam sem lau sac nom-nga ahuc, ma sêñsahê ñandê atu e kôm ñac sêseñ êmbala. Magoc ñac sem dau kwi ma sêhu si mêtê sac sin dom. Sêsôm yom sac-sac pi Anötö undambê-nga bu in kêñ ñawapac dinan têt ñac.

¹² Ma añela ti-6-nga pô in ndê sùc tuc sip bu atu Yupretes, dec bu dau pa. Bocdinan kin nan sêmeñ akên gameñ ac pi-nga, nan si señ yêc bu sêlom bu dau. ¹³ Ma aö galic ñalau sac tö, nan sêtôm pocwê. Dan sa akên akô whasun, ma dan sa akên gêt sac whasun. Ma ñalau sac titö-nga

sa akêñ propet tasan* whasuñ. ¹⁴ Sadañ ndê ñalau sac tō dinañ sêkôm gêñ dalô atu-tu. Ma sêsa si bu sêndic kiñ nom-ñga hoñ sa, bu sêndic siñ têñ têm Anötö Ñaclai Ñadau ndê bêc atu hôc asê. ¹⁵⁻¹⁶ Ma ñac sic kiñ hoñ sa sêmbo gameñ nañ yêc Yom Hîbru sêsam bu Amagedon.

Pômdau sôm yom bocdec, “Ayob daôm ñapep! Aô wakêñ puc pi ndoc wameñ-ñga dom, aô wameñ gitôm ñgac kañ. Mac lau nañ anem ali ma amasan daôm ñapep ambo, mac oc atac ñayham tu atap Anötö ndê mwasiñ sa-ñga. Tigeñ lau nañ sêmasañ dau dom têñ bêc aô wambu wameñ, nañ ñac oc maya dau atu, gitôm lau nañ sêmbo ñamlic ñambwa.”

¹⁷ Têñ dinañ añela ti-7-ñga pô in ndê sùc tuc pi umboñ. Ma awaha atu dañ akêñ pôn atu yêc lôm dabuñ ta yom ma sôm, “Gêñ hoñ pacndê su!” ¹⁸ Ma sickac ti wapap gic ti ñakêcsia atu, ma tiyhô gêm. Tiyhô dau atu andô. Têñ lau ñamata-ñga si têm e meñ têñ kwahic dec, tiyhô dañ gêm atu gitôm in dinañ dom. ¹⁹ Anötö gauc gêm malac atu Babilon ndê lau si mêtê sac, dec kêmatôc ñac gitôm in kêñ in ndê tac ñandê atu sip laclhu dañ ma kêñ têñ ñac bu sênôm. Ma tu dinañ-ñga tiyhô atu dau gêm e gic malac atu Babilon kôc gi toñ tō. Ma lau nom-ñga si malac hoñ sêtisac bocdinañ. ²⁰ Ma nduc ti lôc hoñ siñga. ²¹ Ma u ñalhuc ñaṅga gitôm hoc ais sip meñ tuc lau. Ais dinañ atu sac ma ñadehe gitôm

* **16:13** Jon sam gêñ sac tilu-ñga nañ sa akêñ nom ñalôm (Rev 13:11-18) bu propet tasan. Ñahu bu in kôm gêñ dalô atu-tu bu êñsau lau nom-ñga. Alic Rev 19:20.

40 kilogram tòm gi. Gêñ dau kên ñawapac atu têt lau nom-nga, ma sêsôm yom sac sambuc pi Anötö.

17

Awhê mockaiñ-nga ma gêñ sac

¹ Ma añela nañ sêkôc sùc 7, nañ si dañ têt aö meñ ma sôm, “Mweñ ma lic! Ñagêyô nañ Anötö oc kên têt lauwhê mockaiñ-nga hoñ ñadinda,* nañ ndöc gameñ nañ bu daêsam sêpoc, n añ aö bu watôc têt am. ² Kiñ nom-nga daêsam sêtêt awhê mockaiñ-nga dinañ si, ma sêkôm mêtê mockaiñ-nga sêwhiñ iñ. Ma lau nom-nga sêñkuc iñ ndê mêtê sac sêwhiñ, e ñac si gauc timboloc gitôm lau nañ sênôm wain ñañga ma kên iñ ñac.”

³ Têt dinañ Ñalau Dabuñ kôm aö gatun kaiñ dañ sa, ma añela dau kôc aö gasa gameñ sawa ga. Ma yêc dindê aö galic awhê dañ ndöc gêñ sac kokoc ñahô. Gêñ sac dinañ ndê ñagôlôn 7, ma ñapo 10, ma aö galic ñaê sac-sac gêm iñ ñamlic sambuc ahuc. ⁴ Awhê dau sôc ñakwê ñayham dadalô kokoc ma ñamayañ. Ma iñ kêngôlôn dau

* **17:1** Yêc 17:5 Jon whê sa bu yom nañ iñ to pi lauwhê mockaiñ-nga ñadinda, nañ hêganôn malac Babilon, ma Rev 18:1-24 tôc ñalêñ nañ Anötö oc kên ñagêyô têt iñ, nañ asê. Lau ñatô gauc gêm bu iñ to yom dau pi malac Rom. Ma lau ñatô sêñyalê bu yom dau gitôm yom gôliñ dañ, ma hêganôn lau hoñ nañ sêtec bu sêsôc Anötö ñapu ma sêkên kisa iñ ndê lau, tòm lau Babilon-nga sêkôm têt lau Israel-nga muñ su. Mêtê mockaiñ-nga ti dôhôn pi mêtê sac nañ lau kaiñ dinañ sêkôm (alic Ais 23:16-17; ma Nah 3:4). Jon sôm bu awhê mockaiñ-nga ndöc kên iñ bu daêsam, tòm malac Babilon dau (Jer 51:13).

ɲa gol, ma hoc ɲayham, ma ɲa gêɲ ɲawasi gwêc-
 ɲga naɲ sêsam bu pearl. Sùc gol daɲ yêc in
 amba, ma in ndê mêtê sac ti mêtê ɲadômbwi
 atu naɲ in kôm, naɲ sip sùc dau ɲalôm e meɲhu.
⁵ Ma in ndê ɲaê naɲ ɲahu yêc sin dau, naɲ sêto
 pi in sêcbala bocdec bu:

Malac atu Babilon.

Lauwhê mockaiɲ-ɲga ma mêtê ɲadômbwi
 nom-ɲga hon
 ɲadinda.

⁶ In awhê naɲ kêgilí lau nom-ɲga bu sêndic
 Anötö ndê lau dabuɲ naɲ sêhoc yom asê pi Yisu,
 naɲ ndu. Ma aö galic bu dac naɲ sêkêc sin, naɲ
 kôm awhê dinaɲ ndê gauc tisac, gitôm in nôm
 wain ɲaɲga. Aö galic in ma gasö ɲandô.

⁷ Goc aɲela ndac aö bocdec bu, “Bocke dec
 am sö? Kêɲ daɲam aö, dec oc wawhê gêɲ sac
 ti ɲagôlôn 7 ma ɲapo 10, ma awhê naɲ ndöc
 gêɲ sac dau ɲahô, naɲ ɲahu sa têtɲ am. ⁸ Gêɲ
 sac dinaɲ in mbo muɲ-ɲga, magoc kwahic dec
 in aɲgô mba. Ma tiɲambu in oc pi sa akêɲ suɲ
 baliɲ sac ma Anötö oc seɲ in su niɲga gacgeɲ.
 Ma lau nom-ɲga oc sêhêdaê ɲandô têtɲ têtɲ sêlic
 gêɲ sac dau. ɲahu bu ɲamata-ɲga gêɲ sac dau
 mbo, ma kwahic dec aɲgô mba, tigeɲ tiɲambu
 oc mbu meɲ tiyham. Anötö kêyalê lau sac nom-
 ɲga dinaɲ gwanaɲ su, têtɲ ndoc in kêɲ undambê
 ti nom, dec in to ɲac si ɲaê sip Buku Tanli-ɲga
 dom.

⁹ “Lau naɲ sêkôc gauc ɲapep, naɲ oc sêɲyalê
 gêɲ dau ɲahu. Gêɲ sac ndê ɲagôlôn 7 sem dôhôn
 lôc 7 naɲ awhê dau ndöc. ¹⁰ Ma sem dôhôn
 kiɲ 7 whiɲ. Kiɲ amaɲdaɲ si ndoc pacndê su,

ma kwahic dec kiŋ ti-6-ŋga gêm gôliŋ mbo, ma kiŋ ti-7-ŋga ndê ndoc yêc dôŋ yêc. Tinambu kiŋ dau oc meŋ, magoc iŋ oc nem gôliŋ ŋasawa baliŋ dom. ¹¹ Ma gêŋ sac naŋ muŋ-ŋga mbo, ma kwahic dec aŋgô mba, naŋ oc ti kiŋ ti-8-ŋga. Iŋ oc mbo whiŋ kiŋ 7 si toŋ, magoc iŋ gic waê bu Pômdau oc seŋ iŋ su niŋga. ¹² Ma ŋapo 10 naŋ am gêlic, naŋ sêti dôhôn kiŋ 10 naŋ si ndoc sênem gôliŋ-ŋga yêc dôŋ yêc. Tigeŋ têŋ ndoc gêŋ sac mbu meŋ bu nem gôliŋ, naŋ kiŋ 10 dinaŋ oc sênem gôliŋ sêwhiŋ iŋ. Magoc ŋac si ndoc dau oc apê eŋ. ¹³ Ŋac hoŋ oc sêpiŋ dau dôŋ, ma sêkêŋ ŋac si ŋaclai têŋ gêŋ sac ma sêsôc iŋ ŋapu. ¹⁴ Ma ŋac oc sêndic siŋ têŋ Anötö ndê Domba ti iŋ ndê lau. Tigeŋ Domba dau oc ku ŋac dulu. Ŋahu bu Anötö ndê Domba iŋ kiŋ hoŋ si Kiŋ, ma iŋ pômdau hoŋ si Pômdau. Ma iŋ ndê lau oc sêlhac sêwhiŋ iŋ. Ŋac lau naŋ iŋ kêyaliŋ ŋac sa sêti iŋ ndê, ma kêgalêm ŋac sa, ma sêsap si sêkêŋ whiŋ iŋ dôŋ ŋapaŋ.”

¹⁵ Ma aŋela dau gic têku yom ma sôm têŋ aö, “Am gêlic bu daêsam naŋ awhê mockaiŋ-ŋga ndöc. Bu dinaŋ sem dôhôn lau titon-titon ma lau awha têtêŋ, ma lau akêŋ nom ŋagameŋ hoŋ. ¹⁶ Ma am gêlic gêŋ sac ti iŋ ndê ŋapo 10 naŋ sêti dôhôn kiŋ sac 10 dinaŋ. Ŋac oc sêkêŋ kisa awhê mockaiŋ-ŋga dau, ma sêkôm iŋ tisac. Ŋac oc sêkôc iŋ ndê ŋakwê su, sêneŋ iŋ ndê ŋamsôm, ma sêkêŋ ya neŋ iŋ su. ¹⁷ Ŋac oc sêkôm bocdinaŋ, ŋahu bu Anötö dau kêŋ gauc sip ŋac si ŋalôm bu sêkêŋ si ŋaclai têŋ gêŋ sac ma sêsôc iŋ ŋapu, ma sêkêŋ kisa awhê mockaiŋ-

nga. Anötö k êyaliñ ñagêyô dinañ sa gwanañ su, ma kiñ sac dinañ oc sêkôm iñ ndê yom ñandô sa. ¹⁸ Awhê mockain-nga nañ am gêlic su, iñ ti dôhôn malac atu nañ kiñ nom-nga hon s êsôc iñ ndê ñagôlin sac-nga ñapu.”

18

Babilon tisac

¹ Dinañ su, ma aö galic añela dañ tiyham sip akêñ undambê meñ. Iñ ndê ñaclai atu, ma iñ ndê ñawê ti ñawasi atu pô nom. ² Ma iñ mbwêc awha atu, “Malac atu Babilon tisac su. Aêc, tisac su ma tiganañ. Kwahic dec lau dañ oc sêndöc malac dau tiyham dom, ma oc ti ñalau sac si gameñ, ma mbac nañ señ gêñ ñasu, nañ si gameñ. ³ Malac dau tisac, ñahu bu iñ wê lau nom-nga sêsa señ sac-nga gitôm awhê mockain-nga dañ. Kiñ nom-nga sêkôm mêtê sac sêwhiñ iñ, ma lau nom-nga bocdinañ. Ñac sêñkuc iñ ndê mêtê sac e ñac si gauc timboloc tôm lau nañ sênôm wain ma kênin ñac. Ma lau sêtidulu gêñ-nga sêtap awa atu sa tu iñ ndê mêtê êmwasiñ dau ña gêñ ñayham-ñayham-nga.”

⁴ Ma aö ganğô awha dañ tiyham akêñ undambê nañ sôm yom bocdec, “O aneñ lau. Anğô! Alhö su yêc malac dinañ ma ambo awê, mboe mac añkuc iñ ndê mêtê sac ma atap ñawapac atu sa tôm iñ dau. ⁵ Alhö su, ñahu bu iñ ndê sac pi e gi suñ undambê sa, ma Anötö gauc gêm mêtê sac hon dinañ. ⁶ Kwahic dec sac nañ malac dau kôm têtñ lau, nañ oc sêô tidim lu mbu têtñ iñ. Iñ oc êñsahê ñawapac atu, nañ hóc gêlêc ñawapac

nañ in kênj têtj lau, nañ su. Oc nditôm in nôm gên yêc dau ndê laclhu ñawapac-nga nañ in kênj têtj lau sênôm. ⁷ Têtj ñamata-nga in toc dau sa, ma kêmwasinj dau ña gên ñayham-ñayham. Tigenj kwahic dec in oc êñsahê ñawapac ti ñandê atu ô gên ñayham dinanj su. Tôm ñasawa baliñ lec in sôm yom pi dau bocdec bu, ‘Aö gambo gatôm kwin, ma oc wambo ñayham enj. Watañ danjgibo gitôm awhê sawa danj dom.’ ⁸ Tu dinanj-nga, yêc bêc tigenj ñalôm, ñawapac daêsam oc nem in ahuc. In ndê lau oc sêpônnda gên danenj-nga, daêsam oc sêmbac ndu ma daêsam oc sêtañ danjgibo, ma Pômdau Anötö oc kênj ya neñ in su. Anötö in Ñaclai Ñadau, ma in oc êmatôc in, ma kênj ñawapac hoñ dinanj têtj in.

⁹ “Ma kinj nom-nga nañ sêkôm mêtê sac sêwhinj in, ma sêpo dau sa ña in ndê gên ñayham-ñayham, nañ oc sêlic yawasu atu nañ sa akênj in. Ma ñac oc sêtañ atu pi in. ¹⁰ Ñandê nañ in hôc, nañ oc kôm ñac sêtôc dau atu, ma ñac oc sêlhac ahê ma sêtañ bocdec bu, ‘Oyaê, Oyaê! O malac atu Babilon. Muñ-nga am malac ti ñaclai atu! Tigenj acgatu ñasawa tigenj lec am tisac, ma gacgenj ginjam su!’

¹¹ “Ma lau sêtidulu gên-nga bocdinañ. Ñac hoñ oc sêtañ atu tu in-nga. Ñahu bu in ginja su, ma lau mba bu sênemlhi ñac si wapa tiyham. ¹² Muñ-nga lau Babilon-nga semlhi ñac si gênj kainj gitôm gol, silba, ma ðhoc ñayham-ñayham, pearl, ma po ñawasi ti ñadalô ñayham-ñayham. Ma semlhi a ñayham tidau-tidau, ma gênj daêsam nañ lau sêmasañ ña a ñayham-

ņayham, ma ņa elepan ņapo ti ain, brons, ma hoc ņawasi. ¹³ M a semlhi gêņ naņ dakêņ sip gêņ daney-ņga gitôm msê, ma semlhi a ņakwi ti gêņ ņamalu ņayham ņaôli atu-tu, wain, olib ņakwi, bolom ma plawa. Ma semlhi makao, domba, hosi, ma kaleta. Ma semlhi lau ņatô tu bu sêti ņac si lau akin ņambwa-ņga.

¹⁴ “B ocdinaņ lau wapa-ņga dinaņ oc sêsôm, ‘Gêņ ņayham-ņayham hoņ naņ am tac whiņ, naņ kwahic dec giņga su. Am nem mone ti ņawasi hoņ pacndê sambuc.’ ¹⁵ Lau naņ sêtidulu gêņ dau ma sêtap mone daêsam sa yêc Babilon, naņ oc sêlhac ahê ti sêtöc dau atu, ma sêhu daņgibo atu asê ti sêtaņ. ¹⁶ M a ņac oc sêmbwêc, ‘Oyaê, Oyaê, malac atu! Ñamata-ņga am nem lau sêsôc ņakwê ņayham gitôm kiņ si. Ma g ol ti pearl ma hoc ņayham-ņayham daêsam ti nem gôlôn atu. ¹⁷ Tigeņ acgatu ņasawa tigeņ ma gêņ ņayham hoņ dinaņ siņga su.’

“Ma lau naņ sem gôliņ waņ atu gwêc-ņga, ma lau naņ sêkôm gwelen sêmbo waņ, ma lau naņ sêpi waņ sêsôc sêsa tu sêtap awa sa-ņga, naņ hoņ oc sêlhac ahê ma tahê. ¹⁸ Têņ ndoc sêlic yawasu atu naņ pi akêņ malac dau, naņ ņac oc sêsôm, ‘Malac daņ hóc gêlêc malac atu dinaņ su dom. Yomandô!’ ¹⁹ Ñac si ņalôm oc ņawapac atu e sêkêņ kop pi ņac ņagôlôn. Ma ņac oc sêtaņ atu ti sêmbwêc bocdec bu, ‘Oyaê, Oyaê, malac atu! Ñamata-ņga iņ malac ti lêlôm. Ma waņ ņadau hoņ naņ sêkôc wapa sêsôc sêsa ņapaņ, naņ sêtap mone atu sa yêc iņ. Magoc acgatu ņasawa tigeņ lec ma iņ giņga su.’ ”

²⁰ Ma aö gangô awha dañ sôm yom bocdec bu, “Mac lau undambê-nga hoñ atac ñayham atu! Anötö ndê lau ñapotel, ti lau propet, ma lau dabuñ ñatô, mac hoñ atisambuc! Kwahic dec Anötö kêñ ñagêyô têtñ malac atu Babilon, ô mêtê sac nañ Babilon kôm têtñ mac.”

²¹ Têtñ dinañ añela ñaşa dañ hóc hoc atu dañ sa, goc tuc sip gwêc gi, ma sôm, “Ñalêtñ tigen Anötö oc tóc in ndê ñaclai asê ma señ malac atu Babilon su. ²² Lau dañ oc sêmbo malac dau ñalôm tiyham dom. Oc tôm dom bu dañgô lau wê-nga sêyu gasuc me dahuc ma sêndic hap tiyham. Ma lau nañ sêkôm gwelen tidau-tidau me lau nañ sêmasañ bolom, nañ si dañ oc sêmbo tiyham dom. ²³ Lam dañ oc ñawê sa dom, ma lauwhê ti ñgac oc sênem dau tiyham dom. Muñ-nga lau Babilon-nga nañ sêtidulu gêñ, nañ sêti lau tiwaê nom-nga. Ma Babilon ndê mêtê sac gic wasu lau hoñ e ñac si gauc kêñsôn ma wê ñac sêsa señ sac-nga. ²⁴ Ma yêc malac dau, lau sêkêc Anötö ndê lau propet ti ndê lau dabuñ si dac siñ, tôm ñac sic Anötö ndê lau ñatô ndu yêc nom ñagameñ hoñ.”

19

Lau undambê-nga sêmpiñ Anötö

¹ Têtñ dinañ aö gangô ñ akêcsia atu yêc undambê g itôm lau daêsam sêmbwêc bocdec, “Haleluya! Tampin yac neñ Anötö, bu in ndê ñaclai ti waê ma ñawasi atu, ma mwasin nem lau si-nga yêc in tawasê. ² Tampin in, bu in kêmatóc lau ñalêtñ gitêtñ ma ti yom ñandô. Bu

malac atu Babilon in̄ gitôm awhê mockain̄-nga dan̄, ma in̄ ndê mêtê sac tidau-tidau kôm gameñ nom-nga hoñ sêtisac. Ma kwahic dec Anötö kêmatôc malac dau ma kêñ ñagêyô atu ô in̄ ndê lau akiñ si dac.”³ M a ñac hoñ sêmbwêc tiyham ma sêsôm, “Haleluya! Yawasu atu oc pi akêñ Babilon ñapan̄.”⁴ Ma lau bata 24 ti añela atu hale sêpôn̄ haduc ma sêmpin̄ Anötö nañ ndöc ndê pôn̄ atu. Ma sêmbwêc bocdec, “Yomandô! Haleluya!”

⁵ Têñ dinan̄ aö gañgô awha dan̄ s a akêñ pôn̄ atu, nañ sôm, “O Anötö ndê lau akiñ! Mac lau hoñ nañ atoc in̄ sa ma asôc in̄ ñapu, mac lau tiwaê ma lau waêm̄ba hoñ ampin̄ yac neñ Anötö!”⁶ Ma aö gañgô awha daêsam sêmbwêc yom tiyham. Ñakêcsia dau gitôm bu hêc atu, ma gitôm wapap gic. Ma sêsôm, “Haleluya! Yac neñ Pômdau, Anötö Ñaclai ñadau, gêm gôlin̄ gêñ hoñ.”⁷ Datoc in̄ ndê waê sa ti atac ñayham atu! Bu ndoc meñ sa bu Anötö ndê Domba nem in̄ ndê awhê.* Awhê dau kêmasañ dau su,⁸ ma Anötö kêñ ñakwê ñayham ma ti ñawasi atu têt in̄ bu sôc.” Ñakwê ñayham dinan̄ gêm dôhôn̄ mêtê gitêñ hoñ nañ Anötö ndê lau dabuñ sêkôm.

⁹ Goc añela dinan̄ sôm têt aö, “To yom dindec, ‘Atac ñayham mac lau hoñ nañ Anötö kêgalêm mac sa bu aneñ Domba ndê mwasiñ nem awhê-nga.’ ” Ma in̄ gic têt ku yom ma sôm, “Yom dindec in̄ Anötö ndê yom ñandô.”¹⁰ Aö gañgô yom dinan̄ su, goc gahu dauñ gayêc in̄ gahi-nga bu

* **19:7** Awhê nañ Domba oc nem, nañ gêm dôhôn̄ lau hoñ nañ sêkêñ whin̄ Yisu, nañ sêti in̄ ndê gôlôwac dabuñ.

wampin in. Magoc in kalhac aö ahuc ma sôm, “Mba! Kôm bocdina in dom! Bu aö ngac akin nambwa, gitôm am, ma gitôm am nem asidôwai hon na in sêsap yom nandô pi Yisu dô in. Pôn hamduc tên Anötô ma nem akin in tigen! Bu yom nandô na in lau sêhoc asê pi Yisu, na in ti lau propet si yom, na in nahu andô.”

Sin atu tên bêc nambu-nga

¹¹ Tên dina in aö galic undambê kac sa, ma hosi sêsêp da in kalhac aö a in n-nga. Ma ngac na in ndôc hosi dau nahô, na in sêsam in ndê naê bu “Ngac sôm yom nandô ti kôm ndê yom nandô sa-nga.” In kêmâtôc yom ma gic sin tên lau nalên gitên. ¹² In tandô gitôm ya nawê, ma sanem kin-nga daêsam sac in nagôlôn. Ma naê na in Anötô to pi in, na in namalac da in sênjalê dom. In tigen kêyalê. ¹³ Aö galic nakwê bali in na in in sôc, na in dac hi ahuc.† Sêsam in ndê naê bu, “Anötô ndê Yom.” ¹⁴ Ma lau sin-nga undambê-nga sêndôc hosi sêsêp, sêsôc nakwê sêsêp nawasi nayham, ma sênkuc in. ¹⁵ Aö galic bien namata sa yêc in ndê whasu in bu ndic lau sac nom-nga, ma in kôc tôc kin-nga ti naclai atu bu êngwini in nac ma ku nac dulu. Anötô Naclai Nadau in tac nandê atu pi lau nom-nga, ma ngac dina in oc kwê nac dô in, gitôm lau sêkwê wain nandô dô in e nakwi sa. ¹⁶ Ma aö galic bu sêto naê da in pi in ndê nakwê, ma pi in apuhu bocdec bu, “Kin hon si Kin, ma pômdau hon si Pômdau.”

† **19:13** Lau natô gauc gêm bu dac dina in in ndê nacyo si dac - alic Rev 14:14-20; ma Ais 63:1-3. Ma natô gauc gêm bu Yisu dau ndê dac, na in in ndê nacyo sêkêc sin.

¹⁷ Têñ dinan aö galic anjela dan kalhac ac nahô. Ma in mbwêc awha atu têt mbac hon nan sêhu sêmbo lôlôc bocdec bu, “Akac daôm sa amen, bu anen mwasiñ atu nan Anötö kêmasañ. ¹⁸ Amen ma anen lau sac nom-nga si namsôm. Kin ti lau bata siñ-nga ma lau atu-tu, ma lau siñ-nga ti nac si hosi, lau akiñ ti lau nan sêmbo nambwa, ma lau tiwaê ma lau waêmba, lau hon dinan mac amen anen nac si namsôm.”

¹⁹ Ma aö galic gêt sac namata-nga, ma kin nom-nga, ma nac si lau siñ-nga hon sêkac dau sa bu sêndic siñ têt in nan ndôc hosi sêsêp nahô ti in ndê lau. ²⁰ Magoc sêkôc gêt sac dau dôn, ma propet tasan whiñ. Propet tasan dinan, in gêt sac tilu-nga nan kôm gêt dalô atu-tu gêm gêt sac namata-nga anğô. In kôm gêt dalô dinan ma kêsau lau nan gêt sac ndê nadalô kalhac nac si sêcbala ma sêpôn haduc têt in ndê nagatu. Têt ndoc sêlô gêt sac lu dinan dôn, nan nac sic inlu ndu dom. Sêmbo tali, ma sêmbaliñ inlu sêsip sê atu ya-nga, nan gêt nandê solpa golom napan. ²¹ Ma bien namata sa akêt ngac nan ndôc hosi nahô whasun, ma gic inlu si lau hon ndu. Ma mbac hon sêhu sêsip ma sen nac si namsôm. Sen ma sen ma sen, e sêlic na tandô.

20

Yala 1,000

¹ Ma aö galic anjela dan sip akêt undambê men. In anjela nan kôc ki bu yob sun baliñ sac nagatam. Ma in kôc sen gapocwalô-nga atu dan yêc in amba. ²⁻³ In sip nom gi ma kôc akô dôn,

mboc akwa nan dasam bu ngac yeyec me Sadañ. Inj kôc inj ma sô inj dôñ ña sen dinañ, goc kêbaliñ inj sip sunj baliñ gi. Ma inj kêlahi gatam ahuc ma sap dôñ. Sadañ oc ndöc gapocwalô dinañ gitôm yala 1,000. Bocdinañ oc tôm dom bu inj sa ndi bu êñsau lau nom-ñga tiyham e yala 1,000 dinañ pacndê su. Ma tiñambu Anötö oc êñgapwêc inj su ma inj oc sa awê meñ ma mbo ñasawa apê.

⁴ Aö tanhê undambê tiyham, ma galic lau nan Anötö kêñ ñaclai têtñ ñac bu sêmatôc lau, nan sêndöc si pônñ atu. Ma aö galic lau ñatô. Muñ-ñga lau dinañ sêlhac ñañga ma sêpuc Anötö ndê yom dôñ, ma sêhoc yom asê pi Yisu. Ñac sêpônñ haduc têtñ gêtñ sac ma têtñ inj ndê ñagatu dom, ma sêkôc inj ndê ñadalô pi ñac si sêcbala me amba dom. Ma tu dinañ-ñga lau ñatô sêkêtñ kisa ñac ma sêtim ñac si ñagôlônñ kic. Magoc kwahic dec Anötö uñ ñac sa sêmbo tali tiyham, bu sênem g ôliñ sêwhiñ Yisu gitôm yala 1,000. ⁵ Dinañ ti têtñ lau ñamata-ñga sêtisa-ñga. Lau ñatô nan sêmbac ndu su, nan oc sêtisa dom e yala 1,000 dinañ pacndê. ⁶ Lau nan sêtisa têtñ têtñ ñamata-ñga dinañ, ñac lau dabuñ ma sêtap Anötö ndê mwasiñ atu sa. Ñac oc sêti lau dabuñsiga bu sêlhac Anötö lu Yisu añgô-ñga, ma ñac oc sênem gôliñ sêwhiñ inj gitôm yala 1,000. Ma ñac oc sêmbo ñayham têtñ bêtñ Anötö êmatôc lau, bêtñ nan lau sêmbac ndu tidim tilu-ñga.

Sadañ ndê têtñ pacndê

⁷ Tiñambu, têtñ yala 1,000 dinañ pacndê su goc Anötö oc êñgapwêc Sadañ su yêc gapocwalô.

⁸ Ma inj oc sa ndi bu êñsau lau nan sêmbo nom

ņagameņ hoņ, ma ndic ņac sa bu sêndic siņ têtņ Anötö ndê lau. Sadaņ oc ndic lau daêsam andô sa, nditôm gaņgac gwêc-ņga, oc dasê sa nditôm dom. Anötö ndê ņacyo dinaņ sêtôm Gog ma Magog.* ⁹ Aö galic ņac sêti akêtņ gameņ hoņ ma sêņsêlêtņ tawahô sa e sêhôt asê gameņ naņ Anötö ndê lau sêndöc. Gameņ dinaņ malac atu naņ Anötö tac whiņ. Ma sêņgihi Anötö ndê lau ahuc bu sêndic ņac, magoc Anötö kêtņ ya sip akêtņ undambê meņ gêtņ ņac hoņ su. ¹⁰ Ma têtņ dinaņ iņ kêtņ ņagêyô atu têtņ Sadaņ naņ kêsau ņac. Iņ kêbaliņ iņ sip sê atu ya ti gêtņ ņandê solpa-ņga, naņ muņ-ņga sêmbaliņ gêtņ sac lu propet tasaņ sêsip si su. Yêc gameņ dindê ņac oc sêņsahê ņandê atu andô ņapaņ têtņ acsalô ma têtņ ôbwêc, oc pacndê dom.

Anötö oc êmatôc lau batê

¹¹ Dinaņ su, goc aö galic pôtņ sêsêp atu, ma Pômdau dau ndöc ņahô. Ma umboņ ma nom giņga su yêc iņ aņgô-ņga, ma pacndê sambuc. ¹² Goc aö galic lau batê hoņ naņ sêtisa tiyham. Lau tiwaê, ma lau waêmba sêwhiņ, hoņ sêtisa s êmbo tali tiyham, ma sêlhac Anötö ndê pôtņ atu ņa-ndö-ņga. Muņ-ņga, têtņ ndoc lau dinaņ sêmbo tali, naņ yom pi ņac si mêtê, ma gêtņ hoņ naņ sêkôm, naņ sêto sip buku yêc undambê. Ma kwahic dec Anötö kac buku hoņ dinaņ sa, ma Buku Taņli-ņga whiņ, bu êmatôc ņac hoņ êņkuc mêtê bocke naņ sêkôm têtņ têm sêmbo tali. ¹³ Lau

* **20:8** Gog ma Magog - ņaê lu dinaņ hêganôtņ lau hoņ naņ danġapêc têtņ Anötö ma sêkêtņ kisa têtņ iņ ndê lau. Alic yom ņatô yêc Ese 38-39.

hoŋ naŋ sêmbac ndu sêsip gwêc si, naŋ sêtisa yêc gwêc ŋalôm. Ma lau batê sêsa akêŋ gameŋ bocke naŋ sêmbac ndu sêyêc naŋ. Ma Anötö kêmatôc ŋac hoŋ tôm gi, kêkuc gêŋ bocke naŋ ŋac sêkôm su. ¹⁴ Pacndê su, goc iŋ kêbaliŋ iŋ ndê ŋacyo lu naŋ sêsam bu, “Ŋaclai Dambac Ndu-ŋga” ma “Ŋaclai Lambwam-ŋga,” naŋ sêsip sê atu ya-ŋga ŋalôm si. Ya atu dinaŋ ti gameŋ bu lau sac sêmbac ndu tidim tilu-ŋga. ¹⁵ Ma lau hoŋ naŋ si ŋaê yêc Buku Tanli-ŋga dom, naŋ Anötö kêbaliŋ ŋac sêsip ya atu sêwhiŋ.

21

Malac Jerusalem Wakuc

¹ Têŋ ndoc dinaŋ aö galic undambê wakuc, ma nom w akuc, bu nom ti gwêc ŋamata-ŋga ma undambê ŋamata-ŋga siŋga su. ² Ma aö galic malac dabuŋ Jerusalem wakuc, naŋ Anötö kêŋ sip akêŋ undambê meŋ. Iŋ kêgôlônŋ malac wakuc dau ŋa gôlônŋ ŋayham kêlêc, gitôm sêŋgôlônŋ awhê daŋ tu bu nem ŋgac-ŋga. ³ Ma aö gaŋgô awha atu daŋ sa akêŋ pônŋ atu meŋ, naŋ sôm, “Kwahic dec Anötö ma iŋ ndê lau oc sêmbo sêwhiŋ dau. Iŋ dau oc ndöc whiŋ ŋac ti ŋac si Anötö, ma ŋac sêti iŋ ndê lau. ⁴ Ŋawapac têm akwa-ŋga hoŋ pacndê su. Anötö oc puŋ tasulu su yêc iŋ ndê lau tandô. Ma ŋac oc sêmbac ndu me sêhóc ŋandê tiyham dom, ma ŋac oc tasulu sa me sêtaŋ daŋgibo tiyham dom.”

⁵ Ma iŋ naŋ ndöc pônŋ atu, naŋ sôm têtŋ aö, “Kwahic dec aö oc wamasanŋ gêŋ hoŋ tiwakuc. Am to yom naŋ aö wasôm têtŋ am, bu aneŋ yom

in yom nandô, ma am to sip bapia bu lau sêsam ma sêkên whin.” ⁶ Goc in sôm têt aö, “Aö gac hu gêt hon, ma wandic dabin gêt hon. Aéc, aö gati namata gêt hon, ma aö gati nambu gêt hon. Ma kwahic dec gêt hon nandô sa su. Lau hon nan bu yô nac, nan wakên bu têt nac sênôm yêc Bubata Tanli-nga. Aö wakên bu dau têt nac nambwa. ⁷ Lau hon nan sêlhac nanga ma sêku sac dulu, nan oc sêwêkain gêt wakuc hon dindec. Aö wati nac si Anötö, ma nac oc sêti anej balêkoc awê ma ngac. ⁸ Tigen lau nan sêtöc dau ma sêsêc si sêken whin Yisu ahuc, ma lau nan sêken whin dom, lau nan sêkôm mêtê sac ti mêtê mockain-nga, nac nan sic namalac ndu, lau m bectoma, lau nan sem akin gwam, ma lau nan sêkôm tasan, lau kain dinañ hon oc sêwêkain gamen ya-nga, nan ya sa napan, ma gêt nandê solpa oc tun nac. Gêt dinañ ti nac si sêmbac ndu tilu-nga.”

⁹ Aö gangô yom dinañ su, goc añela dan têt aö meñ. In añela 7 nan sêkôc sùc nawapac nambu-nga-nga, nan si dan. Ma in sôm têt aö bu, “Mwen, ma lic! Aö watöc têt am, awê nan Anötö ndê Domba oc nem.” ¹⁰ Goc Nalau kôm aö gatun kain dan sa, ma añela dau kôc aö sa ma kêt aö galhac lôc atu dan nahô. Ma malac dabun Jerusalem, nan Anötö kêt sip akêt undambê meñ, nan in tôc têt aö. ¹¹ Anötö ndê nawasi gêm malac dau ahuc. Ma malac dau nawasi sa gitôm hoc nayham jaspâ ma nawa gitôm glas. ¹² Aö galic tun baliñ dan kêgihi malac dau, ma gatam 12, ma añela 12 nan sêyob gatam. Ma

yêc gatam 12 aö galic ñaê 12. Lau Israel-nga si gôlôwac toñ 12 si ñaê dinan. ¹³ G atam tö sêyêc tunj têtj ac pi-nga, gatam tö têtj ac sip-nga, gatam tö yêc ñamakê danğa, ma gatam tö yêc danğa. ¹⁴ Tunj dau sêkwê sac hoc atu 12 ñahô. Ma aö galic Anötö ndê Domba ndê lau aposel 12 si ñaê sêyêc hoc 12 dinan.

¹⁵ Anjela nanj sôm yom dau têtj aö, nanj kôc gêtj danem dôhônj gêtj-nga danj nanj sêmasanj ña gol, bu nem dôhônj malac, ma tunj ti gatam. ¹⁶ Inj gêm dôhônj malac, ma tap sa bu malac ña-balinj-nga gitôm dôñ 12,000, ma gic pôc-nga gitôm dôñ 12,000, ma pi lôlôc-nga gitôm dôñ 12,000.*

¹⁷ Ma inj gêm dôhônj tunj dau ñadandi, nanj gitôm dôñ 144.† Inj kêkuc dôhônj nanj ñamalac sênem dôhônj gêtj-nga, ma gêm dôhônj malac dau. ¹⁸ Tunj dinanj, sêmasanj ña hoc ñawasi jaspä. Ma malac dau sêmasanj ña gol ñawasi atu ma ñawa gitôm glas. ¹⁹⁻²⁰ Ma hoc atu-tu 12 nanj tunj sac ñahô, nanj sêñgôlônj ña †hoc ñayham-ñayham. Sêñgôlônj hoc ñamata-nga ña hoc ñayham nanj sêsam bu jaspä, ma hoc tilu-nga sêñgôlônj ña sapaya, ma hoc titö-nga e têtj hoc a tu ti-12-nga, nanj sêñgôlônj ña aget, emerel, oniks, kanelian, krisolait, beril, topas, krisopras, yasint, ma ametis. ²¹ Ma gatam 12 dinanj sêmasanj ña gêtj ñawasi gwêc-nga 12 nanj sêsam bu pearl. Ma señj atu nanj gic malac dau kôc, nanj sêmasanj ña gol ñawasi atu, ma ñawa

* **21:16** Dônj dinanj sêsam bu 'Stedia,' ma stedia 12,000 dinanj gitôm 2,200 kilometa. † **21:17** Dônj dinanj sêsam bu 'Kyubit,' ma kyubit 144 gitôm 65 mita.

gitôm glas.

²² Aô tanhê malac, ma galic bu Anötö ndê lôm dabuŋ daŋ kalhac dom. Nahu bu Pômdau Anötö Nacalai Nadau, lu in ndê Domba sêndöc malac dau ŋalôm, ma lau malac-ŋga sêpônda lôm dabuŋ daŋ tu bu sênem akiŋ Anötö-ŋga dom. ²³ Ma ac ti ayô mba, nahu bu Anötö dau ndê ŋawasi pô malac, ma in ndê Domba ndê ŋawê ti lam malac-ŋga. ²⁴ Lau akêŋ gameŋ hoŋ oc sêŋsêlêŋ sêmbo ŋawê atu naŋ sa akêŋ malac dau. Ma kiŋ nom-ŋga oc sêsôc malac dau sêndi ti ŋac si waê ti ŋawasi tôhôŋ. ²⁵ Ôbwêc ti ŋ asec pacndê sambuc, ma tu dinaŋ-ŋga oc sêsêc gatam ahuc dom. ²⁶ Gêŋ ŋawasi ma gêŋ tiwaê akêŋ nom ŋagameŋ sambob, naŋ Anötö oc kôc sa sôc malac dau ndi. ²⁷ Magoc gêŋ ŋadômbwi daŋ oc sôc ndi dom. Lau naŋ sêkôm mêtê sac ma lau tasan daŋ oc sêsôc sêndi dom. Lau naŋ si ŋaê yêc Anötö ndê Domba ndê Buku Tanli-ŋga, naŋ tawasê oc sêsôc sêndi.

22

Bu Tanli-ŋga

¹ Goc aŋela dinaŋ tôc Bu Tanli-ŋga têtŋ aô, naŋ ŋawa gitôm glas. Bu dau hêc sa yêc Anötö ma Domba si pônŋ atu, ² ma k eselenŋ kêkuc seŋ atu naŋ gic malac dau kôc. Ma A Tanli-ŋga kalhac bu dau ŋamakê danŋa lu-lu, ma gêm ŋandô tôm ayô hoŋ. Ma lau nom-ŋga hoŋ naŋ sêndöc malac Jerusalem wakuc, naŋ oc gêmbac kôm ŋac dom, bu A Tanli-ŋga dau ŋalaunŋ oc kôm ŋac ŋamlic ŋayham ŋapanŋ. ³ Têtŋ têm ŋamata-ŋga Anötö

pucho nom tu ñamalac si sac-nga, tigen têt têt ñambu-nga ñawapac dau oc pacndê sambuc. Anötö lu Domba si pôn kiñ-nga oc lhac malac lôm, ma in ndê lau oc sênem akiñ in yêc dindê. ⁴ Ñac oc sêlic in aᅅgô andô, ma in ndê ñaê oc yêc ñac si sêcbala. ⁵ Gameñ oc ñasec sa tiyham dom, bu ôbwêc pacndê, ma lau oc sêpônnda lam ñawê ti ac ñawê dom. Ñahu bu Pômdau Anötö ndê ñawê oc pô ñac. Ma lau dinañ oc sêmbo ti sênem gôliñ sêtôm kiñ ñapañ.

Pômdau Yisu oc mbu meñ

⁶ Aö galic gêt hoñ dinañ su, goc añela dau sôm têt aö, “Yom hoñ dindec in yom ñandô, ma yom ñayham tu lau hoñ sêkêt whiñ-nga. Pômdau Anötö nañ kêt in ndê Ñalau puc lau propet dôn, nañ kwahic dec kêkiñ in ndê añela bu tôc gêt hoñ dindec asê têt in ndê lau akiñ. Ma gêt dau kêpiñ bu oc ñandô sa.”

⁷ Ma Yisu sôm, “Aᅅgô! Kêpiñ su oc wambu wameñ. Asa nañ kôc yom nañ Anötö hoc asê gwanañ yêc buku dindec, nañ sa ma danğa wambu, nañ oc tap Anötö ndê mwasin atu sa.”

⁸ Aö Jon gaᅅgô ma galic gêt hoñ nañ gato sip bapia dindec. Ma têt ndoc añela tôc gêt hoñ dau asê têt aö su, nañ aö gahu dauñ gayêc in gahi-nga bu wampin in. ⁹ Tigen in sôm têt aö, “Kôm bocdinañ dom! Pôn hamduc têt Anötö ma êmpin in tigen! Aö ᅅgac akiñ ñambwa, gatôm am, ma gatôm am nem asidôwai lau propet, ma gatôm lau nañ danğa wambu yom hoñ nañ yêc buku dindec.”

10 Goc in̄ sôm t̄n̄ aö, “Ndoc meñ k̄piñ. Bocdinañ yom nañ Anötö hoc asê yêc buku dindec nañ, siñ kwi dom, magoc k̄n̄ yêc lhu bu lau sêsam. 11 Lau nañ sêsap mêtê sac ma mêtê ñadômbwi dôn, nañ oc sêkôm sêmbo e Yisu mbu meñ. Magoc lau nañ sêsa l̄n̄ git̄n̄ ma l̄n̄ dabuñ, nañ sêsap si l̄n̄ ñayham dau dôn mañ e Yisu mbu meñ.”

12 Ma Yisu sôm, “Am ngô! K̄piñ su oc wambu wameñ, ma wak̄n̄ ñagêyô ñayham me sac t̄n̄ lau hoñ êñkuc mêtê nañ ñac sêkôm. 13 Ñamata-ñga t̄n̄ ḡn̄ hoñ, ma t̄n̄ ḡn̄ hoñ ñambu-ñga, aö dec gambo. Aêc, aö gati ñamata ḡn̄ hoñ, ma gati ñambu ḡn̄ hoñ. Aö gac hu ḡn̄ hoñ, ma wandic bata ḡn̄ hoñ. 14 Mac lau nañ ambo ahê mêtê sac hoñ, dec tôm mac añgwasiñ nem ñakwê ñawasi sa, nañ oc atap Anötö ndê mwasiñ atu sa. In̄ oc k̄n̄ mac aneñ ñandô yêc A Tanli-ñga, ma mac oc asôc malac Jerusalem wakuc ñagatam andi. 15 Magoc lau sac oc sêsôc sêndi dom. Lau mbectoma, lau nañ sêkôm mêtê mockaiñ-ñga, ñac nañ sic ñamalac ndu, ma lau nañ sem akiñ anötöi gwam, ti lau nañ sêkôm tasan̄ ma ñac nañ atac whiñ mêtê tasan̄, lau hoñ dinañ oc gacgeñ sêmbo awê gitôm giam pôm.

16 “Aö Yisu dec, kakiñ aneñ añela bu hoc yom hoñ dindec asê t̄n̄ mac, bu andic dulu t̄n̄ Anötö ndê lau dabuñ hoñ. Aö Dawid ndê Ñahu, nañ gambo gamuñ in̄, ma Dawid ndê Wakuc bocdinañ. Ma aö gatôm Têtênda, tata bêbêc-ñga nañ ñawasi atu.”

17 Ñalau Dabuñ, lu awê nañ oc nem Anötö

ndê Domba, nañ sêsôm bu, “Mwenj!” Ma am asa nañ ngô yom dindéc, nañ sôm, “Mwenj!” Am asa nañ bu yô am, nañ mwenj, ma nôm Bu Tanli-nga nañ am oc kôc sa ñambwa, ñaôli mba. ¹⁸ Tigenj aô wapuc yom hoñ nañ Anötö hoc asê gwananj yêc buku dindéc, nañ dôñ. Ñamalac dañ bu ndic têku yom dindéc ña inñ dau ndê yom, dec Anötö oc kêñ ñawapac hoñ nañ gato ñayom sip buku dindéc, nañ têtñ inñ. ¹⁹ Ma ñamalac dañ bu kôc yom ñalhô dañ su yêc yom nañ Anötö hoc asê gwananj yêc buku dindéc, dec Anötö oc señ inñ su bocdinañ, ma inñ oc so gêñ ñayham-ñayham nañ buku dindéc tôc asê. Inñ oc wêkainñ ndê mala yêc malac dabuñ dom, ma neñ ñandô yêc A Tanli-nga dom.

²⁰ Inñ nañ hoc yom ñandô asê pi gêñ hoñ dindéc, nañ sôm, “Yomandô! Kêpiñ su aô oc wambu waloc.”

Yomandô! Mwenj Pômdau Yisu!

²¹ Pômdau Yisu ndê mwasiñ ndi têtñ Anötö ndê lau hoñ. Yomandô!

Anötö ndê Yom Lêñsêm Wakuc
Bugawac: Anötö ndê Yom Lêñsêm Wakuc New
Testament

copyright © 2013 Lutheran Bible Translators Australia

Language: Bugawac

Contributor: Wycliffe Bible Translators, Inc.

All rights reserved.

2020-11-11

PDF generated using Haiola and XeLaTeX on 21 Feb 2024 from source
files dated 29 Jan 2022

1dcc5a6c-3c1e-54e8-aa77-af18a3782048